


高僧傳三集



BL
1460
T73
1887
V.2



高僧傳三集卷第四

宋左街天壽寺通慧大師賜紫沙門贊寧等

奉敕撰

義解篇第二之一

正傳二十七人附見七人

唐京兆大慈恩寺窺基傳

釋窺基。字洪道。姓尉遲氏。京兆長安人也。尉遲之先與後魏同起。號尉遲部。如中華之諸侯國。入華則以部爲姓也。魏平東將軍說。六代孫孟都生羅迦。爲隋代州西鎮將。乃基祖焉。考諱宗。唐左金吾將軍松州都督江由縣開國公。其鄂國公德。則諸父也。唐書有

傳基母裴氏夢掌月輪吞之。寤而有孕。及乎盈月誕彌。與羣兒弗類。數方誦習。神晤精爽。奘師始因陌上見其眉秀目朗。舉措疎略。曰將家之種不謬也哉。脫或因緣相扣。度爲弟子。則吾法有寄矣。復念在印度時計迴程。次就尼犍子邊占得卦甚吉。師但東歸。哲資生矣。遂造北門將軍。微諷之出家。父曰伊類麤悍。那勝教詔。奘曰此之器度。非將軍不生。非某不識。父雖然諾。基亦強拒。激勉再三。拜以從命。奮然抗聲曰。聽我三事。方誓出家。不斷情欲。葷血過中食也。奘先以欲勾牽。後令入佛智。佯而肯焉。行駕累載前之所

欲故關輔語曰。三車和尚。卽貞觀二十二年也。一基
自序云。九歲丁艱。漸疎浮俗。若然者。三車之說。乃厚
誣也。至年十七。遂預緇林。及乎入法。奉敕爲奘師弟
子。始住廣福寺。尋奉別敕。選聰慧穎脫者。入大慈恩
寺。躬事奘師。學五竺語。解紛開結。統綜條然。聞見者
無不歎伏。凡百犍度。跋渠一覽無差。寧勞再憶。年二
十五。應詔譯經。講通大小乘教。三十餘本。創意畱心。
勤勤著述。蓋切問而近思。其則不遠矣。造疏計可百
本。奘所譯唯識論。初與昉。尚光四人。同受潤色。執筆
檢文。纂義數朝之後。基求退焉。奘問之。對曰。夕夢金

容晨趨白馬。雖得法門之糟粕。然失玄源之醅粹。某
不願立功於參糅。若意成一本。受責則有所歸。奘遂
許之。以理遣三賢。獨委於基。此乃量材授任也。時隨
受撰錄所聞。講周疏畢。無何西明寺測法師亦俊朗
之器。於唯識論講場。得計於聞者。賂之以金。潛隱厥
形。聽尋聯綴。亦疏通論旨。猶數座方畢。測於西明寺
鳴椎集僧。稱講此論。基聞之。慚居其後。不勝悵快。奘
勉之曰。測公雖造疏。未達因明。遂爲講陳那之論。基
大善三支。縱橫立破。述義命章。前無與比。又云。請奘
師唯爲已講瑜伽論。還被測公同前盜聽。先講。奘曰。

五性宗法。唯汝流通。他人則否。後躬遊五臺山。登太行。至西河古佛宇中宿。夢身在半山巖下。有無量人。唱苦聲。冥昧之間。初不忍聞。徒步陟彼層峯。皆瑠璃色。盡見諸國土。仰望一城。城中有聲曰。住住。咄。基公未合到此。斯須。二天童自城出。問曰。汝見山下罪苦眾生否。荅曰。我聞聲而不見形。童子遂投與劒一鐔。曰。剖腹當見矣。基自剖之。腹開有光兩道。暉映山下。見無數人受其極苦。時童子入城。持紙二軸及筆投之。捧得而去。及旦驚異未已。過信夜寺。中有光。久而不滅。尋視之。數軸發光者。探之得彌勒上生經。乃憶

前夢必慈氏令我造疏通暢厥理耳。遂援毫次筆鋒。有舍利二七粒而隕。如吳含桃許大。紅色可愛。次零然而下者。狀如黃粱粟粒。一云。行至太原傳法。三車自隨。前乘經論箱裘。中乘自御。後乘家妓女僕食饌。於路閒遇一老父。問乘何人。對曰。家屬。父曰。知法甚精。攜家屬偕。恐不稱教。基聞之頓悔前非。翛然獨往。老父則文殊菩薩也。此亦卮語矣。隨旻在玉華宮。參譯之際。三車何處安置乎。基隨處化徒。獲益者眾。東行博陵。有請講法華經。遂造大疏焉。及歸本寺。恆與翻譯舊人往還。屢謁宣律師。宣每有諸天王使者執

事。或冥告襍務。爾日基去方來。宣怪其遲暮。對曰。適者大乘菩薩在此。善神翼從者多。我曹神通。爲他所制。故爾。以永淳元年壬午示疾。至十一月十三日。長往於慈恩寺翻經院。春秋五十一。法臘無聞。葬於樊村北渠。祔三藏樊師塋隴焉。弟子哀慟。餘外執紼會葬。黑白之眾。盈於山谷。基生常勇進。造彌勒像。對其像。日誦菩薩戒一徧。願生兜率。求其志也。乃發通身光瑞。爛然可觀。復於五臺造玉石文殊菩薩像。寫金字般若經畢。亦發神光焉。弟子相繼取基爲折中。視之如奘在焉。太和四年庚戌七月癸酉。遷塔於平原。

大安國寺沙門令儉。檢校塔亭。徙棺見基齒有四十根不斷。玉如眾彈指言。是佛之一相焉。凡今天下佛寺圖形。號曰百本疏主真。高宗大帝製讚。一云玄宗。然基魁梧堂堂。有桓赳之氣。而慈濟之心。誨人不倦。自天然也。其符彩則項負玉枕。面部宏偉。交手十指。若印契焉。名諱上字多出沒不同者。爲以慈恩傳中云。樊師龍朔三年。於玉華宮譯大般若經終筆。其年十一月二十二日。令大乘基奉表奏聞。請御製序。至十二月七日。通事舍人馮義宣由此云。靈基。開元錄爲窺基。或言乘基。非也。彼曰大乘基。蓋慧立彥棕不

全斥。故云大乘基。如言不聽泰耳。猶謹遣大乘光奉表同也。今海內呼慈恩法師焉。

系曰。性相義門。至唐方見大備也。奘師爲瑜伽唯識開創之祖。基乃守文述作之宗。唯祖與宗。百世不除之祀也。蓋功德被物。廣矣大矣。奘苟無基。則何祖張其學乎。開天下人眼目乎。二師立功與言俱不朽也。然則基也。鄂公猶子。奘師門生。所謂將家來爲法將。千載一人而已。故書有之。厥父菑。厥子乃肯播。矧能肯穫。其百本疏主之謂歟。

唐京師西明寺道世傳

釋道世。字玄暉。姓韓氏。厥先伊闕人也。祖代因官爲京兆人焉。生且渥潤。漸而聰敏。俄厭眾沙。思參救蟻。二親鍾愛。遏絕其請。久而遂心。時年十二。於青龍寺出家。從執德瓶止臨欣鑑。律宗研覈。書籍鑽尋。特慕上乘。融明實性。於時籍甚。三輔欽歸。顯慶年中。大帝以玄奘師所翻經論。未幾詔入內。及慈恩寺大德。更代行道。不替於時。世亦預其選。及爲皇太子造西明寺。爰以英博召入斯寺。時道宣律師當塗行律。世且旁敷。同驅五部之車。共導三乘之軌。人莫我及。道望芬然。復因講貫之餘。仍覽甚深之藏。以爲古今緜代。

製作多人。雖雅趣佳辭無足於傳記。由是搢文囿之菁華。嗅大義之瞻蔔。以類編錄號法苑珠林。總一百篇。勒成十裘。始從劫量終乎襍記。部類之前各序別論。令學覽之人就門隨部。檢括所知。如提綱焉。如舉領焉。世之用心周乎十稔。至總章元年畢軸。蘭臺郎李儼爲之都序。此文行於天下。又著善惡業報及信福論。共二十三卷。大小乘禪門觀。及大乘觀。共十一卷。受戒儀式。禮佛儀式。共六卷。四分律討要五卷。四分律尼鈔五卷。金剛經集注三卷。十部都一百五十三卷。世頗多著述。未測其終。名避太宗廟諱。多行字。

耳。故時稱玄暉焉。

唐京兆大慈恩寺普光傳

釋普光。未知何許人也。明敏爲性。爰擇其本。請事三藏。奘師勤恪之心。同列靡及。至於智解。可譬循環。聞少證多。奘師默許。末參傳譯。頭角特高。左右三藏之美。光有功焉。初奘嫌古翻俱含義多缺。然躬得梵本。再譯真文。乃密授光。多是記憶西印薩婆多師口義。光因著疏解判。一云。其疏至圓暉略之爲十卷。如漢之有淹歟。又嘗隨奘往玉華宮譯大般若經。厥功出乎裨贊也。時號大乘光。觀夫奘自貞觀十九年創譯

記。麟德元年終於玉華宮。凡二十載。總出大小乘經律論七十五部。一千三百三十五卷。十分七八是光筆受。或謂嘉光普光也。若驗從辯機同參譯務。卽普光是也。

唐京兆大慈恩寺法寶傳

莊勝

釋法寶亦三藏奘師學法之神足也。性靈敏利。最所先焉。奘初譯婆沙論畢。寶有疑情。以非想見惑。請益之。奘別以十六字入乎論中。以遮難辭。寶白奘曰。此二句四句。爲梵本有無。奘曰。吾以義意酌情作耳。寶曰。師豈宜以凡語增加聖言量乎。奘曰。斯言不行。我

知之矣。自此無休。頡頑於樊之門。至平六離合釋義。俱舍宗以寶爲定量矣。光師往往同迦溼彌羅餘師。禮記衍字也。時光寶二法師。若什門之融叡焉。後越精義學。令問孔膠。長安三年於福先寺。京西明寺。預義淨譯場。寶與法藏勝莊等證義。於時頗露頭角。莫之與京歟。

唐京師西明寺圓測傳

薄塵靈辯

釋圓測者。未詳氏族也。自幼明敏慧解。縱橫三藏。樊師爲慈恩基。師講新翻唯識論。測賂守門者隱聽。歸則緝綴義章。將欲罷講。測於西明寺鳴鐘召眾。稱講

唯識。基嫌其有奪人之心。遂讓測講訓。奘講瑜伽。還同前盜聽受之。而亦不後基也。迨高宗之末。天后之初。應義解之選。入譯經館。眾皆推挹。及翻大乘顯識等經。測充證義。與薄塵靈辯。嘉尚攸方。共駕所著唯識疏鈔。詳解經論。天下分行焉。

唐京師安國寺元康傳

釋元康。不詳姓氏。貞觀中遊學京邑。有彭亨之譽。形擁腫而短。然其性情酋勇。聞少解多。羣輩推許。先居山野。恆務持誦。觀音求加慧解。遂感鹿一首。角分八岐。厥形絕異。康見之。撫而馴伏。遂豢養之。乘而致遠。

曾無倦色。以三論之文。荷之於背。又以小軸繫之於尾。曳入上都。意爲戲弄。說有之徒。不達空性。我與輕軸碾之。令悟真理。又衣大布。曳納播。戴竹笠。笠寬丈有二尺。裝飾詭異。人皆駭觀。旣入京城。見一法師。盛集講經化導。康造其筵。近其座。便就所講義申問。往返數百言。人咸驚康之辯給如此。復戲法師曰。甘桃不結實。苦李壓低枝。講者曰。輪王千箇子。巷伯勿孫兒。蓋譏康之無生徒也。康曰。丹之藏者赤。漆之藏者黑。隨汝之赤者。非纁絳焉。入汝之黑者。非鉛墨焉。舉眾皆云。辭理渙然。可非垂跡之大士也。帝聞之喜曰。

何代無其人。詔入安國寺講此三論。遂造疏解中觀之理。別撰玄樞兩卷。總明中百門之宗旨焉。後不測其終。

系曰。康師曳納播者何。通曰。梵言立播。華言裹腹衣。亦云抱腹。形制如偏袒。一幅纔穿得手。肩袖不寬。著在左邊右邊施帶。多貯絛絮。然是禦寒之服。熱國則否用。此亦聖開。流於東土。則變成色帛。而削幅綴於左右袖上。垂之製曳。然旌表我通瞻經論一本。則曳一支。多則多曳。未知稽古自何人始乎。今單言播。略立字耳。全非禦寒之意。翻爲我慢之衣。旣失元端而

多濫作。別形聖教。以俟後賢。此外無施異制。以亂大倫。詩曰。服之不稱。身之災也。吁。

唐簡州福聚寺靖邁傳

釋靖邁。梓潼人也。少孺矜持。長高志操。特於經論。研覈造微。氣性沈厚。不妄交結。遊必擇方。抵於京輔。貞觀中。屬玄奘西迴。敕奉爲太穆太后。於京造廣福寺。就彼翻譯。所須吏力。悉與玄齡商量。務令優給。遂召證義大德。諳練大小乘經論。爲時所尊尙者。得一十人。邁預其精選。卽居慈恩寺也。同普光寺棲玄廣福寺。明濬會昌寺。辯機終南山。豐德寺。道宣同執筆。

綴文翻譯本事經七卷。邁後與神昉筆受於玉華宮。及慈恩寺翻經院。皆推適變。故得經心矣。後著譯經圖紀四卷。銓序古今經目。譯人名位。單譯重翻。疑僞等科。一皆條理。見編於藏。開元中。智昇又續其題目焉。

唐新羅國順璟傳

釋順璟者。浪郡人也。本土之氏族。東夷之家系。故難詳練。其重譯學聲教。蓋出天然。況乎因明之學。奘師精研付受。華僧尙未多達。璟之克通。非其宿殖之力。自何而至於是歟。傳得奘師真唯識量。乃立決定相。

違不定量。於乾封年中。因使臣入貢。附至。於時。奘師
長往。向及二年。其量云。真故極成色。定離眼識。自許
初三攝。眼所不攝。故猶如眼根。良以三藏隱密周防。
非大智不明。璟爲宗云。不離於眼識。自許初三攝。眼
所不攝。故猶如眼識也。如此善成他義。時大乘基覽
此作。便見璟所不知。雖然。終仰邊僧識見如此。故歎
之曰。新羅順璟法師者。聲振唐蕃。學包大小。業崇迦
葉。唯執行於杜多。心務薄拘。恆馳聲於少欲。旣而蘊
藝西夏。傳照東夷。名道日新。緇素欽揖。雖彼龍象不
少。海外時稱獨步。於此量作決定相違。基師念遠國

之人有茲利慧。塘突獎師。暗中機發。善成三藏之義。惜哉。璟在本國稍多著述。亦有傳來中原者。其所宗法。相大乘了義教也。見華嚴經中。始從發心。便成佛已。乃生謗毀不信。或云當啓手足。命弟子輩扶掖下地。地則徐裂。璟身俄墜。時言生身陷地獄焉。於今有阮廣表丈餘。實坎窞然。號順璟捺落迦也。

系曰。曲士不可以語道者。束其教也。是故好白者以黑爲污。好黑者以白爲污焉。璟怒心尤重。猛利業增。如射箭頃。墮在地獄。列高僧品次。起穢以自臭耶。通曰。難信之法。易速謗誚。謗誚豈唯一人乎。俾令眾所

知識者。直陷三塗。乃知順璟真顯教菩薩也。況乎趙盾爲法受惡。菩薩乃爲法亡身。斯何足怪。君不見尼犍外道。一一謗佛。而獨使提婆生陷。後於法華會上受記作佛。靜言思之。

唐京兆大慈恩寺嘉尚傳

釋嘉尚。未知何許人也。慧性天資。瓌奇氣質。篇聚堅守。性相克攻。勤在進修。務於翻譯。遠棲心於契三藏門。見宗廟之富。窺室家之好。久稽考瑜伽師地。佛地論旨。成唯識論。深得義趣。隨契於玉華宮。譯大般若經。充證義綴文。多能傑出。及三藏有疾。命尚具錄所

翻經論。合七十五部。總一千三百三十五卷。又錄俱
胝畫像一千幀。造十俱胝像。寫經放生。然燈。令尙宣
讀。奘合掌歡喜曰。吾心中願也。汝代導之。得沒而無
悔焉。奘卒。著述疏鈔。出襍集義。門夥多。天后朝。同薄
塵靈辯等。預譯場證義。功績愈繁。尙初侍奘師在玉
華宮翻經。至初會嚴淨佛土品。說諸佛菩薩以神通
願力。盛大千界上妙珍寶。諸妙香花。及意樂所生五
塵妙境。供養莊嚴說法處。與寺主慧德。夜覩玉華寺
內。廣博嚴淨。伎樂盈滿。又聞三堂講法。明日白奘。歡
喜符合。尙不知所終。

唐淄州慧沼傳

大願
塵外

釋慧沼。不知何許人也。少而警慧。始預青衿。依於庠序。誦習該通。入法修身。不違戒範。乃被時諺。沼閣梨焉。次攻堅於經論。善達翻傳。自奘三藏到京。恆窺壺奧。後親大乘基師。更加精博。及菩提流志於崇福寺。譯大寶積經。沼預其選。充證義。新羅勝莊法師執筆。沙門大願塵外。皆一時英秀。當代象龍。於時武平一充使。盧藏用。陸景初。總預斯場。中書侍郎崔湜。因行香至翻經院。歎曰。清流盡在此矣。豈應見隔。因奏請乞同潤色新經。初沼證義於義淨譯場。多所刊正。譌

言舛義悉從指定。無敢踰制。後著諸疏義。號淄州沼也。

唐京兆大慈恩寺彥棕傳

釋彥棕。未知何許人也。貞觀之末。觀光上京。求法於三藏法師之門。然其才不迫光寶。偏長綴習學耳。於玄儒之業。頗見精微。辭筆之能。殊超流輩。有魏國西寺沙門慧立。性氣魚然。以護法爲己任。著傳五卷。專記三藏。自貞觀中一行盛化。及西域所歷夷險等。號慈恩傳。蓋取寺題也。及削藁云畢。慮遺諸美。遂藏於地穴。至疾亟。命門徒掘土出之。而卒其本。數年流散。

他所搜購。乃獲弟子等。命棕排次之。序引之。或文未允。或事稍虧。重更申明。曰。箋述是也。乃象鄭司農箋毛之詁訓也。或有調之。曰。子與隋彥棕相去幾何。對曰。賜也。何敢望回。雖長卿慕蘭。心宗慕於玉宗。故有以也。詩曰。言念君子。溫其如玉。自許亦顏之士也。或人許焉。棕不知終所。

唐新羅國義湘傳

釋義湘。俗姓朴。雞林府人也。生且英奇。長而出離。逍遙入道。性分天然。年臨弱冠。聞唐土教宗鼎盛。與元曉法師同志西遊。行至本國海門。唐州界。計求巨艦。

將越滄波。倏於中途。遭其苦雨。遂依道旁土龕。閒隱身。所以避飄溼焉。迨乎明旦。相視乃古墳骸骨旁也。天猶霖霖。地且泥塗。尺寸難前。逗留不進。又寄埏甓之中。夜之未央。俄有鬼物爲怪。曉公歎曰。前之寓宿。謂土龕而且安。此夜畱宵。託鬼鄉而多祟。則知心生。故種種法生。心滅。故龕墳不二。又三界唯心。萬法唯識。心外無法。胡用別求。我不入唐。卻攜囊返國。湘乃隻影孤征。誓死無退。以總章二年。附商船達登州岸。分衛到一信士家。見湘容色挺拔。畱連門下旣久。有少女麗服靚粧。名曰善妙。巧媚誨之。湘之心石不可

轉也。女調不見荅。頓發道心。於前矢大願言。生生世世。歸命和尚。習學大乘。成就大事。弟子必爲檀越。供給資緣。湘乃徑趨長安。終南山智儼三藏所。綜習華嚴經。時康藏國師爲同學也。所謂知微知章。有倫有要。德瓶云。滿藏海嬉遊。乃議迴程傳法。開誘復至文登舊檀越家。謝其數稔供施。便募商船。逡巡解纜。其女善妙預爲湘辦集法服。并諸什器。可盈篋筥。運臨海岸。湘船已遠。其女呪之曰。我本實心供養法師。願是衣篋。跳入前船。言訖。投篋於駭浪。有頃疾風吹之。若鴻毛耳。遙望徑跳入船矣。其女復誓之。我願是身。

化爲大龍。扶翼舳舻到國傳法。於是攘袂投身於海。將知願力難屈。至誠感神。果然伸形天矯。或躍蜿蜒。其舟底寧。達於彼岸。湘入國之後。徧厯山川。於駒麗百濟風馬牛不相及地。曰此中地靈山秀。真轉法輪之所。無何。權宗異部。聚徒可半千眾矣。湘默作是念。大華嚴教。非福善之地。不可興焉。時善妙龍。恆隨作護。潛知此念。乃現大神。變於虛空中。化成巨石。縱廣一里。蓋於伽藍之頂。作將墮不墮之狀。羣僧驚駭。罔知攸趣。四面奔散。湘遂入寺中。敷闡斯經。冬陽夏陰。不召自至者多矣。國王欽重。以田莊奴僕施之。湘言

於王曰。我法平等。高下共均。貴賤同揆。涅槃經入不
淨財。何莊田之有。何奴僕之爲。貧道以法界爲家。以
孟耕待稔。法身慧命。藉此而生矣。湘講樹開花。談叢
結果。登堂覩奧者。則智通表訓。梵體道身等數人。皆
啄巨鷲。飛出迦留羅鳥焉。湘貴如說行。講宣之外。精
勤修練。莊嚴刹海。靡憚暄涼。又常行義淨洗穢法。不
用巾帨。立期乾燥而止。持三法衣。瓶鉢之餘。曾無他
物。凡弟子請益。不敢造次。伺其怡寂而後啓發。湘乃
隨疑解滯。必無滓核。自是已來。雲遊不定。稱可我心。
卓錫而居。學侶蜂屯。或執筆書紳。懷鉛札葉。抄如結

集錄似載言。如是義門。隨弟子爲目。如云道身章是也。或以處爲名。如云錐穴。問荅等數章疏皆明。華嚴性海毗盧遮那無邊契經義例也。湘終於本國。塔亦存焉。號海東華嚴初祖也。

唐京兆大慈恩寺義忠傳

釋義忠。姓尹氏。潞府襄垣人也。年始九歲。宿殖之性。志願出家。得淄州沼闍黎爲師。若鳳巢中之生鵲雛也。少秉奇操。慧解不倫。沼授與大涅槃經。時十三歲矣。相次誦徹四十卷。眾皆驚駭。號空門奇童也。二十登戒。學四分律義理淹通。旁習十二門論二本。卽當

講演。沼師知是千里之駿。學恐失時。聞長安基師新造疏章。門生填委。聲振天下。乃師資相將。同就基之講肆。未極五年。又通二經五論。則法華無垢稱。及百法因明俱舍成唯識唯識道等也。由茲開獎。弟子繁多。講樹別茂於枝修。義門旁開於關竅。乃著成唯識論纂要。成唯識論鈔三十卷。法華經鈔二十卷。無垢稱經鈔二十卷。百法論疏最爲要當。移解二無我歸後。是以掩慈恩之繁。於今盛行。勿過忠本。所謂列羣玉。貫眾花。玉裝瓊樹之林。花綴蜀機之錦。輩流首伏。聲彩悠颺。況基師正照於太陽。忠也。旁銜於龍燭。四

方美譽千里歸心者。不可勝算矣。傳持靡怠。僅五十餘年。計講諸教七十許徧。至年七十二。忽起懷土之心。歸於昭義。示同初夏。誦戒行道。每一坐時。面向西北。仰視兜率天宮。冥心內院。願捨壽時。得見天主。永離凡濁。終得轉依。一日晨興。澡洗訖。整肅容儀。望空禮拜。如有哀告之狀。少頃結加趺坐。囑付流通教法之意。畢。忽異香滿室。彩雲垂空。忠合掌仰視曰。穢弱比正。何煩大聖躬來引接。言盡而化。鄉人道教。建塔供養。全身不壞。至今河東鄉里。高岡存焉。

唐新羅國黃龍寺元曉傳

大安

釋元曉。姓薛氏。東海湘州人也。髫髻之年。惠然入法。隨師稟業。遊處無恆。勇擊義圍。雄橫文陣。伉伉然。桓桓然。進無前卻。蓋三學之淹通。彼土謂爲萬人之敵。精義入神。爲若此也。嘗與湘法師入唐。慕奘三藏慈恩之門。厥緣旣差。息心遊往。無何發言狂悖。示跡乖疎。同居士入酒肆倡家。若誌公持金刀鐵錫。或製疏以講襍華。或撫琴以樂祠宇。或閭閻寓宿。或山水坐禪。任意隨機。都無定檢。時國王置百座仁王經大會。徧搜碩德。本州以名望舉進之。諸德惡其爲人。譖王不納。居無何。王之夫人腦嬰癰腫。醫工絕驗。王及王

子臣屬。禱請山川靈祠。無所不至。有巫覡言曰。苟遣人往他國求藥。是疾方瘳。王乃發使泛海入唐。募其醫術。溟漲之中。忽見一翁。由波濤躍出。登舟邀使人入海。覩宮殿嚴麗。見龍王。王名鈐海。謂使者曰。汝國夫人。是青帝第三女也。我宮中先有金剛三昧經。乃二覺圓通示菩薩行也。今託仗夫人之病。爲增上緣。欲附此經。出彼國流布耳。於是將三十來紙。重沓散經。付授使人。復曰。此經渡海中。恐罹魔事。王令持刀裂使人膾腸。而內於中。用蠟紙纏滕。以藥傅之。其膾如故。龍王言。可令大安聖者銓次綴縫。請元曉法師

造疏講釋之。夫人疾愈無疑。假使雪山阿伽陀藥力。亦不過是。龍王送出海面。遂登舟歸國。時王聞而歡喜。乃先召大安聖者黏次焉。大安者。不測之人也。形服特異。恆在市鄽。擊銅鉢。唱言大安。大安之聲。故號之也。王命安。安云。但將經來。不願入王宮闕。安得經。排來成八品。皆合佛意。安曰。速將付元曉講。餘人則否。曉受斯經。正在本生湘州也。謂使人曰。此經以本始二覺爲宗。爲我備角乘。將案几。在兩角之間。置其筆硯。始終於牛車造疏成五卷。王請剋日於黃龍寺敷演。時有薄徒竊盜新疏。以事白王。延於三日。重錄。

成三卷。號爲略疏。洎乎王臣道俗雲擁法堂。曉乃宣吐有儀。解紛可則。稱揚彈指。聲沸於空。曉復昌言曰。昔日採百椽時。雖不預會。今朝橫一棟處。唯我獨能。時諸名德俯顏慚色。伏膺懺悔焉。初曉示跡無恆。化人不定。或擲盤而救眾。或嚙水而撲焚。或數處現形。或六方告滅。亦杯渡誌公之倫歟。其於解性。覽無不明矣。疏有廣略二本俱行本土。略本流入中華。後有翻經三藏。改之爲論焉。

系曰。海龍之宮。自何而有經本耶。通曰。經云。龍王宮殿中有七寶塔。諸佛所說諸深義。別有七寶篋。滿中

盛之。謂十二因緣總持三昧等。良以此經合行世間。復顯大安曉公神異。乃使夫人之疾。爲起教之大端者也。

周京兆崇福寺神楷傳

明恂

釋神楷。姓郭氏。太原人也。卽漢末林宗之後。世襲冠裳。後隨父宦於秦。爲京兆人也。昆弟六人。楷居其季。幼而聰敏。立志弗羣。不樂浮榮。誓求翦落。禮明恂法師爲弟子。卽大乘恂也。洎乎年滿受具。於經論義理。大小該通。耳聞口誦。譬鮮艷之易染。遂講攝大乘俱舍等論。穎晤輩流。罕有齊駕。後因講淨名經。見古師

判處喟然歎曰。美則美矣。未盡善也。乃於安陸白趙山撰疏。一云在越州剡石城寺述作。素有巧性於剡溪南巖之下。映水塑貌。今有池已涸矣。巖下石隙縫閒幽暗。然中有木棺者。云是楷殯於此。遊人下窺。厯厯皆覩。又言楷因慈恩西明等寺。度公者出家。及翻經論。敕諸道高行才學僧。並赴京師。遂應詔而入。配居崇業寺。至天后朝。方行其疏。後卒於此寺。弟子遷塔於南逍遙園焉。實大乘基之法門猶子也。

系曰。楷師遺迹。何京兆剡溪二處孰是。令人疑惑。若兩家之俱見。剡訓焉。此乃古人名顯於四方。因子孫

南北遷徙。追念先宗。遂有僑置焉。如晉氏渡江。衣冠之家多立祖先之遺迹同也。若然者。剡則是楷曾遊歷之地也。

周京兆廣福寺會隱傳

釋會隱。不詳何許人也。精明之氣。綽有盈餘。處於等夷。若雞羣之見鶴也。天皇朝。慎選高學名德。隱膺斯選。麟德二年。敕北門西龍門修書所。同與西明寺玄則等一十人。於一切經中。略出精義。玄文三十卷。號禪林要鈔。書成奏呈。敕藏祕閣。隱亦嘗預翻譯。玄則頗聞著述。高宗朝。斯爲龍象之最焉。

周虎止山寺僧瑗傳

釋僧瑗字辯空。姓郁氏。高平昌邑人也。姬水疏源狼亭襲慶。魯相繼昌侯之業。厯載彌光。少傳纂尙書之風。清塵不昧。瑗夙殖奇穎。早擅嘉祥。母趙氏娠孕之日。側侍聖賢。浮空遊樂。及年六歲。隨母入舍利塔。見聖僧像欣然跳躍。狀若舊交。因啓母出家。母以其尙幼。抑而未許。至年十三。方遂其志。依虎止寺慧嚴法師爲弟子。謙揖之操。出自生知。辯慧之能。業稱上首。以龍朔二年奉敕鬚翦。冥符所應。還隸此山。暨嚴公長往。乃依慧詡禪師。受具足戒。聽常樂寺聰法師三

論甚深無相。疑滯豁除。方便解脫。怡然獨悟。因智從心證。遂詣江寧融禪師求學心法。攝念坐禪。眾魔斯伏。勤行精進。猛獸恆馴。是以名稱普聞。聲光八絕。旗亭趨利。削跡無踐。冬夏不易。常披一衲。或滴水以充於夕渴。或數粒將濟於朝飢。或風雪凜凜。禮誦無替。於六時。或炎暑熾熾。經行不虧。於少選。稱揚歎羨。容色湛如。毀辱訶罵。歡喜而受。每蔭以長松。屬思鴻遠。清泉獨坐。映定水以彫文。虛室高栖。藹禪枝而蕩慮。撰武正名僧苑一卷。注郁子兩卷。文集三卷。蓋道俗之儀表。人物之師範焉。永昌元年十二月二十日。見

身有疾。謂弟子曰。吾聞屍所到處。便爲穢惡。出就別方。乃稱離罪爾。門弟子等。迎止於通波亭北靜志莊。忽聞異香從空而下。瑗遺訓勤切。正觀叮嚀。滅後可依外國法。言訖合掌而終。春秋五十有一。緇素奔慟。咸悲眼滅。弟子僧義玄。及雒山縣尉檀信等。同遵師旨。如法闍維。收其舍利。於寺建塔。勒銘於所。

唐會稽山妙喜寺印宗傳

釋印宗。姓印氏。吳郡人也。母劉氏始娠。鄰家咸見一沙門端雅徐步。入印舍。白劉曰。願爲子焉。母夢同此。再三陳讓不克。父夢有饋梅檀香木。童子跪授付劉。

劉顗厭葷羶。俗閒食味。隔在脣吻之外。及生而長。從師誦通經典。末最精講者。涅槃經。咸亨元年。在京都盛揚道化。上元中。敕入大愛敬寺。居辭不赴。請於蘄春東山忍大師。諮受禪法。復於番禺遇慧能禪師。問荅之間。深詣玄理。還鄉地。刺史王胄禮重殊倫。請置戒壇。命宗度人可數千百。續敕召入內。乃造慈氏大像。所著心要集。起梁至唐。天下諸達者。語言總錄焉。又奉敕江東諸寺院。天柱報恩各置戒壇度人。又纂百家諸儒士三教文意。表明佛法者。重結集之。手筆逾高。著述流布。至先天二年二月二十一日示終。囑

循輪王法葬之年八十七。會稽王師乾立塔銘焉。

唐太原府崇福寺宗哲傳

釋宗哲。西河平遙人也。稚歲而有奇相。聰穎天資。既尋師範。砥節飾躬。屬玄奘三藏新翻諸經論。哲就其門請益無替。凡幾周星。備窮諸典。若指於掌。於奘門下號爲得意哲。猶隋慧布之題目焉。後因講唱。厥義日新。時謂之爲法江。哲曰。爲吾謝此品藻焉。殊不知法海在乎大原矣。所指者。蓋浮止爲滄溟也。哲憫學者不達其意而師諄哉。乃著義例。寰海之內莫不企羨。其如說佛位三事喻中。沼法師言。三點三日。強分

上下。勝劣配屬。太成巧誣。哲云。三事俱得。然無名師。品量。退而省之。哲其得矣。號之得意。豈虛也乎。沼師所以成餘師之說也。

唐洛京佛授記寺德感傳

釋德感。姓侯氏。太原人也。儀容瓌麗。學業精贍。眾典服勤。於瑜伽論。特振聲彩。天皇帝徵爲翻經大德。又與勝莊大儀等同參義淨譯場。對敎受賜言謝。瀏亮。帝悅。尋授封昌平縣開國公。累井田至三千戶。帝爲讚曰。河汾之寶。山嶽之英。早祛俗累。夙解塵纓。緇門仰德。紺宇馳聲。式亞龍樹。爰齊馬鳴。爲時君之所。

貴爲若此也。御製風行。緇伍榮之。後充河南佛授記寺都維那。晚升寺任。中外肅然。終年六十。餘著義門行於世。如其七方便人迴心漸頓。悟義與湛法師爲勍敵耳。故交綏而退焉。

唐太原崇福寺浮止傳

釋浮止。姓張氏。太原人也。挺然奇表。慧悟絕倫。於瑜伽論。差成精博。旁綜羣書。言分雅俗。四方學者。爭造其門。然訥於宣剖。敏於通解。深藏若虛。庸庸品類。多所不知。於時哲公露其頭角。博聞強識之者。懼其觝觸。豈況諸餘乎。哲惟神伏止之義學。故謂爲法海焉。

享年七十餘。終於所居。然未聞其有所著述矣。

高僧傳三集卷四終

音釋

昉

分兩切

賂

落故切。以財與人。

鐔

覃尋二音。鼻也。

翛

先彫切。飛羽貌。

卮

章移切。

切

耐

符遇切。合葬也。

塋

余傾切。墓也。

赴

居柳切。勇也。

菑

側持切。耕田也。

不

穫

胡郭切。穀也。

憚

紆憤切。

洩

達河切。別流也。

裨

頑彌切。助也。

魚

休交切。魚白。

休虛交切。魚也。

頡

頡

頡胡列切。鳥飛上也。

參

乎慣切。

參

參平切。

參

參以切。

穀養

濬

私閏切。

璟

於景切。

袤

莫侯切。廣袤東西。

賓

戶鑑切。

賓

賓地切。

也。盾

杜本切。晉卿名。

幘

張畫繒也。

夥

胡果切。多也。

諺

俗諺也。

壺

壺切。

苦本切。中道也。

箋

則前切。編也。

詁

姑五切。言而明其故也。

震

震

震

震

震

震

白切霏莫卜切壞霏小雨也逗音豆逗止也埏式連切和甕甕蒲歷切

崇雖遂切靚疾政切粉白薰舳舳音逐舳舳音逐

蜿然切蜿於袁切蜿蜒龍貌悅始銳切拭滓側氏核切胡革

𠂔古患切髮貌髻倉幸切仵魚乞切仵壯勇也譖莊蔭切覲狄胡

巫男曰覲女曰睎市兗切滕徒登切黏女廉切恂相倫

剡時冉切塑音素掬土隙孔也剡古詣切瑗於願

切居之切娠升人切詡況羽切斬渠羈切諄蒲未

逆亂也瀏水清貌勅渠京切觥典禮切

高僧傳三集卷第五

宋左街天壽寺通慧大師賜紫沙門贊寧等

奉敕撰

義解篇第二之二

正傳十四人
附見五人

周洛京佛授記寺法藏傳

大儀

釋法藏字賢首。姓康。康居人也。風度奇正。利智絕倫。薄遊長安。彌露鋒穎。尋應名僧義學之選。屬奘師譯經。始預其閒。後因筆受證義潤文。見識不同。而出譯場。至天后朝。傳譯首登其數。實又難陀齋華嚴梵夾至。同義淨復禮譯出新經。又於義淨譯場與勝莊大

儀證義。昔者燉煌杜順傳華嚴法界觀。與弟子智儼講授此晉譯之本。智儼付藏。藏爲則天講新華嚴經。至天帝網義十重玄門。海印三昧門。六相和合義門。普眼境界門。此諸義章皆是華嚴總別義網。帝於此茫然未決。藏乃指鎮殿金師子爲喻。因撰義門徑捷易解。號金師子章。列十門總別之相。帝遂開悟其旨。又爲學不了者設巧便。取鑑十面八方安排。上下各一。相去一丈餘。面面相對。中安一佛像。然一炬以照之。互影交光。學者因曉刹海涉入無盡之義。藏之善巧化誘皆此類也。其如宣翻之寄。亦未能捨。蓋帝王

歸信緇伍所憑之故。洎諸梵僧罷譯。帝於聖歷二年
己亥十月八日。詔藏於佛授記寺講大經。至華藏世
界品。講堂及寺中地皆震動。都維那僧恆景具表聞
奏。敕云。昨請敷演微言。闡揚祕蹟。初譯之日。夢甘露
以呈祥。開講之辰。感地動以標異。斯乃如來降迹。用
符九會之文。豈朕庸虛。敢當六種之震。披覽來狀。欣
惕於懷云。其爲帝王所重實稱非虛。所以華嚴一宗
付授澄觀。推藏爲第三祖也。著般若心經疏。爲時所
貴。天下流行。復號康藏國師是歟。

唐荊州玉泉寺恆景傳

釋恆景。姓文氏。當陽人也。貞觀二十二年。敕度聽習三藏。一聞能誦如說而行。初就文綱律師隸業毗尼。後入覆舟山玉泉寺。追智者禪師習止觀門。於寺之南十里別立精舍。號龍興是也。自天后中宗朝。三被詔入內供養。爲受戒師。以景龍三年。奏乞歸山。敕允其請。詔中書門下及學士於林光宮觀內道場設齋。先時追召天下高僧兼義行者二十餘人。常於內殿修福。至是散齋。仍送景并道俊玄奘各還故鄉。帝親賦詩。學士應和。卽中書令李嶠。中書舍人李乂等數人。時景等捧詩振錫而行。天下榮之。景撰順了義論。

二卷。攝正法論七卷。佛性論二卷。學其宗者。如渴之受漿。至先天元年九月二十五日卒於所住寺。春秋七十九。弟子奉葬於寺之西原也。系曰。江陵玄奘與三藏法師形影相接。相去幾何。然其名同實異。亦猶藺相如得強秦之所畏。馬相如令楊雄之追慕。然則各有所長短。亦可見也。

唐中嶽嵩陽寺一行傳

釋一行。俗姓張。鉅鹿人也。本名遂。則唐初佐命。剡國公公。謹之支孫也。卅歲不羣。聰黠明利。有老成之風。讀書不再覽。已暗誦矣。因遇普寂禪師。大行禪要。歸

心者眾。乃悟世幻。禮寂爲師。出家鬚染。所誦經法。無不精諷。寂師嘗設大會。遠近沙門。如期必至。計逾千眾。時有徵士盧鴻。隱居於別峯。道高學富。朝廷累降蒲輪。終辭不起。大會主事先請鴻爲導。文序讚邑社。是日鴻自袖出其文。置之机案。鐘梵旣作。鴻謂寂公曰。某爲數千百言。況其字僻文古。請求朗雋者宣之。當須面指擿而授之。寂公呼行。伸紙覽而微笑。復置机案。鴻怪其輕脫。及僧聚於堂中。行乃攘袂而進。抗音典裁。一無遺誤。鴻愕視久之。降歎不能已。復謂寂公曰。非君所能教導也。當縱其遊學。自是三學名師。

罕不諮度。因往當陽。值僧真纂成律藏序。深達毗尼。然有陰陽讖緯之書。一皆詳究。尋訪算術。不下數千里。知名者往詢焉。末至天台山國清寺。見一院古松數十步。門枕流溪。淡然岑寂。行立於門。屏聞院中布算。其聲款款然。僧謂侍者曰。今日當有弟子自遠求吾算法。計合到門。必無人導達耶。卽除一算子。又謂侍者曰。門前水合卻西流。弟子當至。行承其言而入。稽首請法。盡授其決焉。門前水復東流矣。自此聲振遐邇。公卿籍甚。玄宗聞之。詔入謂行曰。師有何能。對曰。略能記覽。他無所長。帝遂命中官取宮籍以示之。

行周覽方畢。覆其本。記念精熟。如素所習。唱數幅後。帝不覺降榻稽首曰。師實聖人也。嗟歎良久。尋乃詔對無恆。占其災福。若指於掌。言多補益。時邗和璞者。道術人。莫窺其際。嘗謂尹愔曰。一行和尚真聖人也。漢洛下閎造厯云。八百歲當差一日。則有聖人定之。今年期畢矣。屬大衍厯出。正其差謬。則洛下閎之言可信。非聖人孰能預於斯矣。又於金剛三藏學陀羅尼祕印。登前佛壇受法王寶。復同無畏三藏譯毗盧遮那佛經。開後佛國。其傳密藏。必抵淵府也。睿宗立。宗並請入內集賢院。尋詔住興唐寺。所翻之經。遂著。

疏七卷。又攝調伏藏六十卷。釋氏系錄一卷。開元大
衍歷五十二卷。其歷編入唐書歷律志。以爲不刊之
典。又造游儀黃赤二道。以鐵成規。於院製作。次有王
媼者。行鄰里之老媼。昔多贍行之貧。及行顯遇。常思
報之。一日拜謁云。兒子殺人。卽就誅矣。況師帝王雅
重。乞奏減死。以供母之殘齡。如是泣涕者數四。行曰。
國家刑憲。豈有論請而得免耶。命侍僧給與若干錢
物。任去別圖。媼戟手曼罵曰。我居鄰周給迭互。綳襍
閒抱乳汝。長成何忘此惠耶。行心慈愛。終夕不樂。於
是運算畢。召淨人戒之曰。汝曹挈布囊於某坊。閒靜

地午時坐伺。得生類投囊速歸。明日果有猥彘。引猥
七箇。淨人分頭驅逐。猥母走矣。得猥而歸。行已備巨
盆。逐一入之。閉蓋。以六乙泥封口。誦胡語數契而止。
投明中官下詔。入問云。司天監奏昨夜北斗七座星
全不見何耶。對曰。昔後魏曾失熒惑星。至今帝車不
見。此則天將大儆於陛下也。夫匹夫匹婦不得其所。
猶隕霜天旱。盛德所感。乃能退之。感之切者。其在葬
枯骨乎。釋門以慈心降一切魔。微僧曲見。莫若大赦
天下。玄宗依之。其夜占奏北斗一星見。七夜復初。其
術不可測也。又開元中嘗旱甚。帝令祈雨曰。當得一

器。上有龍狀者。方可致雨。敕令中官同於內庫中徧視之。皆言弗類。數日後指一古鑑。鼻盤龍。喜曰。此真龍也。乃將入壇場。一日而雨。其異術通感爲若此也。玄宗在大明宮。從容密問社稷吉凶。并祚運終畢事。行對以他語。帝詢之不已。遂曰。陛下當有萬里之行。又曰。社稷畢得終吉。帝大悅。復遺帝一金合子。形若彈丸。內貯物。撼必有聲。發之不得。云有急則開。帝幸蜀。蒼黃都忘斯事。及到成都。忽憶啓之。則藥分中當歸也。帝曰。伊藥產於此。師知朕違難。至蜀當歸也。復見萬里橋。曰。一行之言。信其神矣。命中官焚香祝之。

乃告謝也。及昭宗初封吉王。至太子德王。唐爲梁滅。終行之言。社稷畢得終吉也。開元十五年九月於華嚴寺疾篤。將輿病入辭。小閒而止。玄宗此夜夢瞰禪居。見繩牀紙隔開扇。曉而驗問。一如所覩。乃詔京城名德。致大道場。爲行祈福。危疾微愈。其寵愛如是。十月八日。隨駕幸新豐。身無諸患。口無一言。忽然浴香水。換衣趺坐。正念怡然。示滅。一云辭告玄宗。後自駕前。東來嵩山謁禮本師。卽寂也。時河南尹裴寬正謁寂。寂云。有少事。未暇與大尹欸話。且請踟躕休息也。寬乃屏從人止於旁室。伺寂何爲。見潔淨正堂焚香。

默坐。如有所待。斯須叩門連聲云。天師一行和尚至。

僧號天師始見於此言天子師也

行人頗忽切之狀。禮寂之足。附耳

密語。其貌愈恭。寂但頷膺曰。無不可者。語訖又禮。禮語者三。寂唯言是是無不可者。行語訖降階入南室。自閉其戶。寂乃徐召侍者曰。速聲鐘。一行已滅度。左右疾走視之。瞑目而坐。手掩伺息已絕。四眾弟子悲號沸渭。撼動山谷。乃停神於罔極寺。自終及葬。凡經二七日。爪甲不變。髭髮更長。形色怡悅。時眾驚異。帝覽奏悲愴曰。禪師捨朕。深用哀慕。喪事官供。詔葬於銅人原。謚曰大慧禪師。御撰塔銘。天下釋子榮之。

唐京兆西崇福寺智昇傳

釋智昇。未詳何許人也。義理懸通。二乘俱學。然於毗尼尤善其宗。此外文性愈高。博達今古。每嫌聶道真道安。至於明佺宣律師。各著大藏目錄。記其翻傳年代人物者。謂之晉錄。魏漢等錄。乃於開元十八年歲次庚午。撰開元釋教錄二十卷。最爲精要。何耶。諸師於同本異出。舊目新名。多惑其文真僞相亂。或一經爲兩本。或支品作別翻。一一裁量少無過者。如其舊錄。江泌女子誦出經。黜而不留。可謂藻鑑杜塞妖僞之源。有茲獨斷。後之圓照貞元錄也。文體意宗相距。

不知幾百數里哉。麟德中道宣出內典錄十卷。靖邁出圖紀四卷。昇各續一卷。經法之譜無出昇之右矣。

唐中大雲寺圓暉傳

懷遠崇廩

釋圓暉。未詳何許人也。關輔之閒。聲名籍甚。精研性相。善達諸宗。幼於俱舍一門。最爲銳意。時禮部侍郎賈曾歸心釋氏。好樂斯文。多命暉談此宗相。然其難者。則非想見惑繁者。則得非得章。爰請暉師略伸梗槩。究其光師疏義。繁極難尋。又聖善寺懷遠律師。願心相合。因節略古疏頌。則再牒而釋論。乃有引而具注。甚爲徑捷。學者易知。後有崇廩著金華鈔十卷。以

解焉。光寶二師之後。暉公閒出。兩河閒。二京道。江表燕齊楚蜀。盛行暉疏焉。

唐京兆華嚴寺玄逸傳

釋玄逸。姓竇氏。卽玄宗神武皇帝從外父也。繁柯懿葉。莫我與京。昆友姪弟。多升朝列。或以靡麗自持。或以官榮相抗。逸乃風神秀朗。蕭灑拔俗。悟色空之迹。到真寂之場。糠粃膏粱。么麼軒冕。旣而形厠緇伍。學追上流。祕藏香龕。披閱通理。一日喟然興歎曰。去聖日遠。編簡倒錯。或止存夏五。或濫在魯魚。加以筆札偷行。校讎喪句。若犍度失其夾葉。猶禮記脫錯後先。

日見乖謬。迷而不復。有一於此。彝倫攸斁。遂據古今所撰目錄。及勘諸經。披文已浩於几案。積卷仍溢於堂宇。字舛者詳義而綸之。品差者蹟理而綱之。星霜累遷。功業克著。非夫心斷金石。志堅冰蘖者。曷登此哉。旣綜結其科目。諒條而不紊也。都爲三十卷。號釋教廣品。厯章焉。考其大小乘經律論。并東西土賢聖集。共一千八十部。以蒲州共城二邑紙書。校知多少。縛定品次。俾後世無悶焉。其章頗成倫要。備預不虞。古之善制。有樂陵尹靈琛爲序。逸後不知所終。

唐長安青龍寺道氤傳

釋道氤。俗姓長孫。長安高陵人也。父容。殿中侍御史。母馬氏。夢五色雲覆頂。因有娠焉。母常聽講讀大乘經。晝夜不輟。意行太任之胎教也。逮乎誕彌。異香芬馥。成於童稚。神氣俊秀。學問詳明。應進士科。一舉擢第。名喧日下。才調清奇。榮耀親里。後有梵僧扣門分衛。飯訖。願寓宵宿。氤接之談話。言皆詣理。梵僧稱歎。明曉辭訣。方出門。閃然不見。氤由此無調選之心矣。乞願出家。將知良珠度寸。雖有百仞之水。不能掩其光也。何君親而能阻入道之猛利心焉。乃禮京招福寺慎言律師爲師。請益無替。及登戒法。旋學律科。又

隸經論。如是內外偕通矣。時有興善寺復禮法師善屬文。謂氤曰。藉汝少俊。可爲余造西方讚一本。遂襍紙援毫。略不停綴。斯須已就。其辭典麗清淨。佛國境物莊嚴。臨文若現前矣。禮師讀訖。顧左右諸德曰。奇才秀句。吾輩莫能測也。自後服膺窗案。晝夜精勵。辯給難訓。善於立破。禮師仰其風規。嘗於稠人廣眾中。宣言曰。氤之論端勢若泉涌。從此聞天供奉朝廷。玄宗幸雒。敕與良秀法修隨駕。御史李崱同請氤於天宮寺講淨業障經。其疏亦氤之著述也。時一行禪師國之師匠。過慮將來佛法誰堪扞禦。誰可闡揚。奏召

天下英髦。學兼內外者。集於洛京福先寺。大建論場。氤爲眾推許。乃首登座。於瑜伽唯識因明百法等論。豎立大義。六科敵論。諸師茫然屈伏。一行驚異曰。大法梁棟。伊人應焉。余心有憑。死亦足矣。及乎大駕西還。敕令扈從。乃有小疾上表。帝降中使賜藥并方。詔曰。法師將息。朕此藥并方甚好。服食必差。所患痊愈。早來西京。其顧遇也若此。仍屬此際。一行遷神。敕令東宮已下京官九品已上。並送至銅人原藍田設齋。推氤表白。法事方畢。宰相張燕公說執氤手曰。釋門俊彥。宇內罕匹。幸附口錄。向所導文一本。置於篋笥。

由是其文流行天下也。開元十八年於花萼樓對御。定二教優劣。氤雄論奮發。河傾海注。道士尹謙對荅。失次。理屈辭殫。論宗乖舛。帝再三歎羨。詔賜絹五百匹。用充法施。別集對御論衡一本。盛傳於代。後撰大乘法寶五門名教。并信法儀各一卷。唯識疏六卷。法華經疏六卷。御注金剛經疏六卷。初玄宗注經。至若有人先世罪業。應墮惡道。乃至罪業則爲消滅。雖提兔翰。頗見狐疑。慮貽謬解之憾。或作餘師之義。遂詔氤決擇經之功力。剖判是非。奏曰。佛力經力。十聖三賢。亦不可測。陛下曩於般若會中。聞熏不一。更沈注

想自發現行。帝於是豁然若憶疇昔。下筆不休。終無
滯礙也。續宣氤造疏矣。四海嚮風。學徒鱗萃。於青龍
寺執新疏。聽者數盈千計。至於西明崇福二寺。講堂
悉用香泥。築白水際。至於土面。莊嚴之盛。京中甲焉。
開元二十八年。有疾將終。遣門弟子齋遺表云。某末
品輕生。虛均雨露。得陪緇伍。許自精修。雖常袒右肩。
無施舉袂之役。而執錫舒步。得蠲負載之勞。屬以時
暢。玄功德揚真化。不謂勤劬慕學。造次養生。今月十
六日。苦腸忽加湯藥。無救。泉門自掩。安沐堯風。夜臺
一歸。寧逢舜日。有定瘞於蒼隴。無再謁於丹墀云。時

帝覽惻怛。遣中使內給事賈文瓌將絹五十匹。就院
弔贈。宣口敕奉問。氤弟子等適聞法師遷神寂滅。痛
惜良深。未審擬於何處安厝。賜到絹帛等。聖恩追悼。
生榮死哀。光於僧伍。俗壽七十三。僧臘五十三。以其
年秋八月十二日葬於終南山陰逍遙園側。白塔存
焉。

唐京師安國寺良賁傳

釋良賁。姓郭氏。河中虞鄉人也。世襲冠裳。法門之流。
不標祖禰。故闕如也。賁識鑒淵曠。風表峻越。外通墳
典。內善經論。義解之性。人罕加焉。永泰中。不空盛行。

傳譯實難其人。賁預其翻度。代宗請爲菩薩戒師。因新出仁王護國經。敕令撰疏解判。曲盡經意。以所住寺爲疏目。曰青龍也。原夫是經已當三譯。一晉太始三年法護譯一卷。名仁王般若。次秦羅什出。名仁王護國般若波羅蜜。次梁承聖三年真諦於洪州寶因寺譯。名仁王般若并疏六卷。然則晉本初翻。方言尙隔。梁朝所譯。隱而不行。僞秦之經。傳流宇內。柰何止言波羅蜜而闕多字。則是虧其到義。是以肅宗皇帝齋心沐德。請不空重譯。及肅皇晏駕。代宗成先聖之願言。詔興譯務。敕軍容使魚朝恩監護於南桃園。起

乎告朔。終乎望日。帝御承明殿。灌頂道場。躬執舊經。對譯新本。而復爲序冠於經首。仍敕賁造疏通經。賁上表曰。學孤先哲。有玷清流。叨接翻傳。謬膺筆受。幸揚天闕。親奉德音。令於大明宮南桃園。修疏贊演。宸光曲照。不容避席。窮玄珠於貝葉。但益慚惶。捧白璧於丹墀。寧勝報敷。仰酬皇澤。俯課忠勤。旣竭愚誠。庶昭玄造。賁勤勤筆削。三卷克成。奏乞流行。復上牋疏。今年二月二十一日。恩命。令在內園修撰經疏。微僧寡學。懼不稱旨。洗心滌慮。扣寂求音。發明起自於天。言加被仰。憑於佛力。咸約經論。演暢真宗。亦猶集羣。

玉於崑山。納大川於溟海。火生於木。與兩曜而俱明。識轉於如。體一相而等照。成道者法也。載法者經也。釋經者疏也。廣度羣有。同於大通。是菩提心。如陛下意。所撰經疏。繕寫畢功。文過萬言。部有三卷。施行竊慚於愚見。裁成冀荅於聖恩。并念誦儀軌一卷。承明殿講密嚴經對御記一卷。同進上。輕塵玄覽。祇畏無任。荅詔云。法師智炬高明。辭峯迥秀。親憑梵夾。宣闡微言。幽蹟真宗。演成章疏。開如來之祕藏。示羣有之迷津。貫玉聯珠。鉤深致遠。再三披閱。頗謂精詳。傳之招提。永爲法寶也。皇命褒揚。釋門翕盛。又屬章信寺。

初成。執疏服膺者。常數百眾。雖紙貴如玉。無以加焉。其在安國寺講筵。官供不匱。數年之內。歸學如林。大歷七年正月。不空奏請入目錄。敕依。賁於六年徙居集州。教授傳經。不遑寧處。至十二年三月十日。無疾枕肱。終於符陽。春秋六十一。夏臘二十九。宕渠嘉川之人。哀悼法梁摧折。闍維收灰中舍利百餘粒。遺表中。進念誦儀對御記二卷。以其先進者。遂畱在內中。之故。令門弟子齋之重進。後於上都城東。置墳塔焉。卽大歷十三年也。賁累朝供奉應制。辭辯富贍。學問高深。末塗淪躋。同利涉之徙移。若神會之流外。吁哉。

唐越州禮宗傳

釋禮宗。俗姓宋。會稽人也。道氣酋壯。志求玄微。願遂出塵。決除鞅絆。聞長壽寺和尚通達禪觀。往叩其關。學習之心。未嘗少懈。師誨之曰。汝之出塵。有大利益。可謂良玉度尺。雖有十仞之土。不能揜其光矣。乃奮藻攄華。注涅槃經。懷鉛握槧。周於二載。挫銳解紛。怡然理順。遂成夾注八十卷焉。及鄭卿尚書典郡。聞其盛名。致疏往請。確然拒而不赴。景龍二年。有御史大夫馮思忽爾暴終。入一處。有二童子持簿領馮庭對判官廳。按覆罪愆。令望彼巨樹。枝柯可覆數畝。判官

身旁舊識者。張思義招手呼馮曰。吾是汝舅。曾爲洛陽倉吏。被長官越格誣殺。兼假貸太平寺中錢及油麪。於今未脫。汝所坐者。不合於天后宮中亂越。致此暴卒。可發願造涅槃經。鑄鐘。登卽關奏判放。卻還人世。臨行張語馮曰。在閻浮一日造功德。得福無量。胡忍一生不修功德耶。此涅槃經者。禮宗大師注解。從天台傳授。每有善神守護。時張差押馮往諸司考校輕重生處。囑之曰。汝去洛城道光坊內十字街第三宅。是吾家。家有池亭竹樹。爲問妻兒安否。馮起尋經本。未獲而又死。經三日。立限歸寫經。鑄鐘工畢。馮在

世得四十八年終。宗亡春秋九十七焉。

唐錢塘天竺寺法詵傳

釋法詵。姓孫氏。母初夢吞明珠。遂黜魚惡輩。誕彌厥月。生有異表。十五辭親從師。依年受具。行學一集蔚爲教宗。卷伊呂立功之致。陋黃綺肆志之適。遺形理性。與山木爲羣。故地恩貞。大師囑之以華嚴經。菩薩戒起。信論心以靜銑。智與經冥。一夕夢乘大舩。直截滄溟。橫山當前。峻與天極。不覺孤帆鳶戾。懷襄上濟。峯竦竦而忽高。雲溶溶而在下。旣寤。形若委衣。流汗經醒。自此句義不思而得。一部全文。常現心境。事事

無礙之旨。如貫華焉。天寶六年。於蘇州常樂寺。續盧舍那像。化示羣品。大厯二年。於常州龍興寺講。纔登法座。忽有異光。如曳紅縷。漸明漸大。縈旋杳空。久修行者。會中先覩。前後講大經十遍。撰儀記十二卷。大厯十三年十一月七日。沙門慧覺夢巨塔陷地二級。無何。訖示疾而終。春秋六十一。慧命四十二。受法弟子太初。付以香鑪談柄。潯陽正覺。會稽神秀。亦猶儒氏之有游夏焉。訖初講天竺寺。盛闡華嚴。時越僧澄觀就席決疑。深得幽趣。及終。吳興皎然爲碑。邗城肅公爲頌。合揚其美哉。

唐宗師興善寺潛真傳

道超

釋潛真。字義璋。姓王氏。太原華族。後徙爲夏州朔方崇道鄉人也。考珍真卽仲子也。年在學數。業尙典墳。幼好佛書。抑從天性。甫及弱冠。投跡空門。開元二十六年。隸名於本城靈覺寺。明年納具戒。自此聽習律乘。涉遊論海。凡曰講筵。無不探蹟。屬代宗朝。新譯文殊師利菩薩佛刹莊嚴經。敕真造疏。奏云。此經凡有三譯。一西晉太熙中。法護翻。名佛土嚴淨經。文勢多古。語簡理幽。二天后久視中。實叉難陀於清禪寺翻。名文殊受記經。三卽今大曆六年所譯也。伏惟寶應

元聖文武皇帝陛下。天垂帝籙。人歸寶圖。德厚乾坤。
明侔日月。仁恕滋物。夷狄仰德而輸誠。慈惠利生。正
教承風而演化。頃者。鄜坊節度使兼御史中丞杜冕。
奏爲國請諸大乘經。明詔下於祇園。梵旨開於貝葉。
因請三藏不空譯此經等數十部。續有敕下天下梵
宇。各置文殊菩薩像。以旌聖功也。又詔以文殊菩薩
爲上座。皆三藏所請。三藏學究瑜伽。解窮法印。身口
意業。祕密修持。戒定慧學。顯通宣暢。唐梵文字。聲韻
具知。傳譯此經。善符聖旨。文質相兼。璨然可觀。潛真
識智。愚昧學藝。庸淺幸陪清眾。謬在翻傳。虛空藏經。

課虛潤色。猥蒙驅策。述疏讚揚。雖文義荒蕪。已傳京邑。今之所作。蓋有由焉。有金閣寺大德道超禪師。學盡法源。行契心本。親覩靈境。密承聖慈。故久在清涼。屬興淨業。仍於現處。建窣堵波。尋覲法緣。來詣京國。以此經爲大事。以大聖爲本師。顯揚聖德。無過此者。乃稽首三藏誓傳大聖法門。不以潛真庸虛。轉祈和尚。邀令述作。和尚不念前之鄙陋。又令讚釋此經。竊恐難契真詮。敢不盡其愚訥。卽大厯八年十一月疏成。奏過。真學通內外。性相融明。考覆幽玄。研精教理。探蹟今古。比較親疎。分別異同。歸於一義。辯猶泉涌。

思入虛疑。直筆而書。記於絕唱。結成三卷。以作準繩。現在未來。永無疑網矣。又述菩提心義。發菩提心戒。各一卷。三聚淨戒。及十善法戒。共一卷。兼稟承不空祕教。入曼拏羅。登灌頂壇。受成佛印。顯密二教。皆聞博瞻。關內河東代。厯四朝。闡揚妙旨。弟子繁多。加復綱紀興善。保壽二處伽藍。懲勸僧尼。真有力也。以貞乾四年戊辰五月十四日。遺誠門人以疾而臥。二十一日。右脅累足。口誦彌陀佛號。終於興善寺本院。春秋七十一。僧夏四十九云。

唐代州五臺山清涼寺澄觀傳

釋澄觀。姓夏侯氏。越州山陰人也。年甫十一。依寶林

寺

今應天山

霈禪師出家。誦法華經。十四遇恩得度。便隸

此寺。觀俊朗高逸。弗可以細務拘。遂徧尋名山。旁求
祕藏。梯航旣具。壺奧必臻。乾元中。依潤州棲霞寺醴
律師學相部律。本州依曇一隸南山律。詣金陵玄璧
法師傳關河三論。三論之盛于江表。觀之力也。大厯
中就瓦棺寺。傳起信涅槃。又於淮南法藏受海東起
信疏義。卻復天竺。誦法師門。溫習華嚴大經。七年往
剡溪。從成都慧量法師覆尋三論。十年就蘇州從湛
然法師習天台止觀。法華維摩等經疏解。從上智。性

自天然。所學之文如昨拋捨。鮑靜記井。蔡邕後身。信可知矣。又謁牛頭山忠師。徑山欽師。洛陽無名師。咨決南宗禪法。復見慧雲禪師。了北宗玄理。觀自謂己曰。五地聖人。身證真如。棲心佛境。於後得智中起世俗念學世閒技藝。況吾學地能忘是心。遂翻習經傳子史小學蒼雅。天竺悉曇諸部異執。四圍五明祕呪儀軌。至於篇頌筆語書蹤。一皆博綜。多能之性。自天縱之。大厯十一年。誓遊五臺。一一巡禮。祥瑞愈繁。仍往峨嵋。求見普賢。登險陟高。備觀聖像。卻還五臺。居大華嚴寺。專行方等懺法。時寺主賢林請講大經。并

演諸論。因慨華嚴舊疏文繁義約。愀然長想。況文殊主智。普賢主理。二聖合爲毗盧遮那。萬行兼通。卽是華嚴之義也。吾旣遊普賢之境界。泊妙吉之鄉原。不疏毗盧。有幸二聖矣。觀將撰疏。俄於寤寐之間。見一金人當陽挺立。以手迎抱之。無何咀嚼都盡。覺卽汗流。自喜吞納光明徧照之徵也。起興元元年正月。貞元三年十二月。畢功成二十軸。乃飯千僧以落成也。後常思付授。忽夜夢身化爲龍。矯首於南臺。蟠尾於山北。拏攫碧落。鱗鬣耀日。須臾蜿蜒。化爲千數小龍。騰躍青冥。分散而去。蓋取象乎教法支分流布也。四

年春正月寺主賢林請講新疏。七年河東節度使李公自良復請於崇福寺講。德宗降中使李輔光宣詔入都。於闕賓三藏般若譯烏茶國王所進華嚴後分四十卷。觀苦辭請明年入。敕允。及具行至蒲津。中令梁公畱安居。遂於中條山棲巖寺住。寺有禪客拳眉翦髮。字曰癡人。披短褐。操長策。狂歌襍語。凡所指斥皆多應驗。觀未至之前。狂僧驅眾僧洒掃曰。不久菩薩來此。復次壁畫散脂大將。及山麋之怪。往往不息。觀既止。此寺二事俱靜。五月。內中使霍仙鳴傳宣催入。觀至。帝頗敦重。延入譯場刊正。又詔令造疏。遂於

終南草堂寺編成十卷進呈。敕令兩街各講一遍。爲疏時堂前池生五枝合歡蓮華。一華皆有三節。人咸歎伏。尋譯守護國界主經。觀綴文潤色。順宗在春宮。嘗垂教令。述了義一卷。心要一卷。并食肉得罪因緣。洎至長安。頻加禮接。朝臣歸向。則齊相國抗。韋太常渠牟。皆結交最深。故相武元衡。鄭絪。李吉甫。權德輿。李逢吉。中書舍人錢徽。兵部侍郎歸登。襄陽節度使嚴綬。越州觀察使孟簡。洪州韋丹。咸慕高風。或從戒訓。以元和年卒。春秋七十餘。弟子傳法者一百許人。餘堪講者千數。觀嘗於新創雲花寺般若閣下。畫華

藏世界圖相。又著隨疏演義四十卷。允齊相請述華嚴經綱要一卷。法界玄鑑一卷。三聖圓融觀一卷。華嚴法華楞伽中觀論等。別行小鈔疏共三十卷。設無遮大會十二。中具諸塑續形像。繕寫經典。不可殫述。門人清沔。記觀平時行狀云。觀恆發十願。一長止方丈。但三衣鉢。不畜長。二當代名利棄之如遺。三日不視女人。四身影不落俗家。五未捨執受。長誦法華經。六長讀大乘經典。普施含靈。七長講華嚴大經。八一生晝夜不臥。九不邀名惑眾。伐善。十不退大慈悲。普救法界。觀逮盡形期。恆依願而修行也。

唐京師西明寺良秀傳

談筵

釋良秀。姓郭氏。蒲津人也。年及佩觿。挺然離俗。乃往中條山栢梯寺披削。誦通經業。受具律儀。誓以傳講爲已事。勤苦忘疲。三藏俱尋。九流外贍。於時籍甚。孰不欽崇。貞元四年。奉詔與罽賓國般若三藏同譯大乘理趣六波羅蜜經十卷。至五年二月四日。解座寫本進過。尋奉德宗敕。令秀造疏。上表云。去年十一月二十八日。右街功德使王希遷。奉宣令良秀等修撰新翻大乘理趣六波羅蜜經疏者。伏聞至道同源。聖人一貫。大雄示相。演妙音於獨園。寶位分身。霑湛恩。

於雙闕。開佛日於聖日。降絲綸於法輪。所以揚化慈航。致人壽域。不然豈得握真符而契合。應休運以感通。況以此經如來之密印。羣生之度門。得白馬之寶函。啓青龍之祕藏。是第一義理去筌蹄。於最後乘說無分別。加以天文煥發。睿思昭回。真如契心。已闡微於釋氏。般若製序。諒續文於太宗。慈雲溥潤。於大根湛露垂滋。於貝葉良秀等。材惟末學。性異生知。謬寄討論。伏增殞越。上承嚴旨。徒側管以窺天。虔奉本師。懼升堂而鼓瑟。所修撰疏一部。謹附王希遷隨表奉進。伏乞聖慈。許令同修疏沙門談筵。於當寺讚演。及

流布中外。所冀落落真言。示丹青於新學。明明像教。流粉澤於將來。帝覽奏。敕內給事毛瑛琦宣慰。良秀談筵道恆等。宜共賜絹九十匹。至可領取。比修疏義。甚大勤勞也。秋熱兼問師等各平安。好在。秀之辭筆。義端時少倫匹。終沒罔知時代焉。

唐京師西明寺慧琳傳

釋慧琳。姓裴氏。疎勒國人也。始事不空三藏爲室。灑內持密藏外究儒流。印度聲明支那詰訓。靡不精奧。嘗謂翻梵成華。華皆典故。典故則西乾細語也。遂引用字林。字統。聲類。三蒼。切韻。玉篇。諸經。禰史。參合佛。

意詳察是非。撰成大藏音義一百卷。起貞元四年迄元和五載。方得絕筆。貯其本於西明藏中。京邑之間一皆宗仰。琳以元和十五年庚子卒於所住。春秋八十四矣。殆大中五年有奏請入藏流行。近以海中高麗國雖三韓夷族。偏尚釋門。周顯德中遣使齎金入浙中求慧琳經音義。時無此本。故有闕如。

高僧傳三集卷五 終

音釋

燉

徒渾切。燉煌郡名。

惕

他的切。懼也。

雋

祖峻切。萬人祖秀曰雋。

擿

他歷切。挑也。

蔌

蘇木切。

璞

匹角切。

閔

胡觥切。

媪

鳥皓切。老母稱也。

嫗

威遇切。老婦之稱。

高僧傳三集卷六

宋左街天壽寺通慧大師賜紫沙門贊寧等

奉敕撰

義解篇第二之三

正傳十四人
附見六人

唐京師崇福寺惟慤傳一

慧震
弘洸

釋惟慤。俗姓連氏。齊大夫稱之後。本馮翊人。官居上黨。爲潞人也。九歲割愛。冠年納戒。母氏昆弟歸於法門。故慤從其受教。瀾漪內湛。歲蕤外發。嗜學服勤。必無倦色。乃辭渭陽。尋師肄業。或經筵首席。或論集前驅。或參問禪宗。或附麗律匠。其志淵曠。欲皆吞納之。

年臨不惑。尙住神都。因受舊相房公融宅請。未飯之前。宅中出經函云。相公在南海知南銓。預其翻經。躬親筆受。首稜嚴經一部。畱家供養。今筵中正有十僧。每人可開題一卷。慙坐居第四。舒經見富樓那問生起義。覺其文婉。其理玄。發願撰疏。疏通經義。及歸院。矢誓寫文。殊菩薩像。別誦名號。計一十年厥志堅強。遂有冥感。忽夢妙吉祥乘狻猊自慙之口入。由茲下筆。若大覺之被善現談般若焉。起大厯元年丙午也。及將徹簡。於臥寐中見由口而出。在乎華嚴宗中。文殊智也。勒成三卷。自謂從淺智中衍出矣。於今盛行。

一說。稜嚴經。初是荊州度門寺神秀禪師。在內時得本。後因館陶沙門慧震。於度門寺傳出。慙遇之。著疏解之。後有宏沆法師者。蜀人也。作義章開釋此經。號資中疏。其中亦引震法師義例。似有今古之說。此岷蜀行之。近亦流江表焉。

唐京師千福寺懷感傳

釋懷感。不知何許人也。秉持强悍。精苦從師。義不入神。未以爲得。四方同好。就霧市焉。唯不信念佛。少時。逕生安養。疑冰未泮。遂謁善導。用決猶豫。導曰。子傳教度人。爲信後講。爲渺茫無詣。感曰。諸佛誠言不信。

不講。導曰。若如所見。令念佛往生。豈是魔說耶。子若信之。至心念佛。當有證驗。乃入道場。三七日不覩靈瑞。感自恨罪障深。欲絕食畢命。導不許。遂令精虔。三年念佛。後忽感靈瑞。見金色玉毫。便證念佛三昧。悲恨宿垢業重。妄構眾慙。懺悔發露。乃述決疑論七卷。卽羣疑論是也臨終果有化佛來迎。合掌面西而往矣。

唐吳興法海傳

釋法海。字文允。姓張氏。丹陽人。少出家於鶴林寺。白駒匪食其場苗。金翅俄翔其海面。曲從師教。周覽羣經。大壑納川。鄧林聚羽。是以圓入一性。學階空王。擅

當代獨悟之名。剖先賢不決之義。一時外學六籍該通。嘗謂人曰。佛法一門。極唯心地。餘皆椎輪也。天寶中。預揚州法慎律師講肆。同曇一靈一等。推爲顏冉焉。復與杼山晝公爲忘形之交。林下之遊。黑白二徒多從求益焉。

唐洛京佛授記寺慧苑傳

釋慧苑。京兆人也。少而秀異。蔚有茂才。厭彼塵寰。投於淨域。禮華嚴法藏爲師。陶神練性。未幾深達法義。號上首門人也。有勤無惰。內外該通。華嚴一宗尤成精博。苑依寶性論。立四種教。爲有四類。不識如來藏。

如生盲人。則凡夫聲聞辟支初心菩薩也。一迷真異
執教。當凡夫。二真一分半教。當二乘。三真一分滿教。
當初心菩薩。四真具滿教。當識如來藏者也。諸師處
判。或依或違。然其綱領教乘一家之說。次以新譯之
經。未有音釋。披讀之者。取決無從。遂博覽經書。恢張
詰訓。撰成二卷。俾初學之流。不遠求師。覽無滯句。旋
曉字源。然稟從賢首之門。不負庭訓之美也。

唐處州法華寺智威傳

慧威

釋智威。姓蔣氏。縉雲人也。穎脫塵蒙。心遊物表。少事
師於軒轅氏鍊丹山。聞天台宗教盛。遂負笈往沃洲。

石城寺。親灌頂禪師。求請心要。既而得一融道體。二
居宗。定慧方均。寂照相半。雖云自了。急在利他。天與
多能。富有辭藻。著桃巖寺碑。與頭陀寺碑。氣度相表。
後以法眼付授慧威焉。時傳威是徐陵後身。其利智
雄才。斷可知矣。又釋慧威。姓畱氏。東陽人也。總角之
年。露其舊習。抉開愛網。徑入空門。不滯一方。仍參三
益。聞縉雲大威禪師。盛行禪法。裹足造焉。刻志忘勞。
覩威牆奧。一日千里。罔不推稱。至有成業。時謂小威。
然其樂靜居山。罕交人事。指教門人不少。傑出者左
溪玄朗矣。威常修止觀。匪棄光陰。說與行而並馳。語

將嘿而齊貫。落落然。汪汪然。人無得名焉。

唐台州國清寺湛然傳

釋湛然。俗姓戚氏。世居晉陵之荆溪。則常州人也。昔佛滅度後。十有三世。至龍樹。始用文字。廣第一義諦。嗣其學者。號法性宗。元魏高齊間。有釋慧文。默而識之。授南嶽思大師。由是有三觀之學。洎智者大師。蔚然興於天台。而其道益大。以教言之。則然乃龍樹之裔孫也。智者之五世孫也。左溪朗公之法子也。家本儒墨。我獨有邁俗之志。童卯邈焉。異於常倫。年二十餘。受經於左溪。與之言。大駭。異日謂然曰。汝何夢乎。

然曰。疇昔夜夢披僧服。掖二輪遊大河之中。左溪曰。嘻。汝當以止觀二法度羣生於生死淵乎。乃授以本師所傳止觀。然德宇凝精神。鋒爽拔。其密識深行。沖氣慧用。方寸之間。合於天倪。至是始以處士傳道。學者悅隨。如羣流之趣於大川也。天寶初年。解逢掖而登僧籍。遂往越州曇一律師法集。廣尋持犯開制之律範焉。復於吳郡開元寺敷行止觀。無何朗師捐代。挈密藏獨運於東南。謂門人曰。道之難行也。我知之矣。古先至人。靜以觀其本。動以應乎物。二俱不住。乃蹈於大方。今之人或蕩於空。或膠於有。自病病他。道

用不振。將欲取正。捨予誰歸。於是大啓上法。旁羅萬行。盡攝諸相。入於無閒。卽文字以達觀。導語默以還源。乃祖述所傳章句。凡十數萬言。心度諸禪身不踰矩。三學俱熾。羣疑日潰。求珠問影之類。稍見罔象之功。行止觀之盛始。然之力也。天寶末。大厯初。詔書連徵。辭疾不就。當大兵大饑之際。揭厲法流。學徒愈繁。瞻望堂室。以爲依怙。然慈以接之。謹以守之。大布而衣。一牀而居。以身誨人。耆艾不息。建中三年二月五日。示疾佛隴道場。顧語學徒曰。道無方。性無體。生歟死歟。其旨一貫。吾歸骨此山。報盡今夕。要與汝輩談。

道而訣。夫一念無相。謂之空。無法不備。謂之假。不一不異。謂之中。在凡爲三因。在聖爲三德。熟炷則初後同相。涉海則淺深異流。自利利人。在此而已。爾其志之。言訖。隱几泊然而化。春秋七十二。法臘三十四。門人號咽。奉全身起塔。祔於智者大師塋兆西南隅焉。入室弟子吳門元浩。可謂邇其人近其室矣。然平日輯纂教法。明決前疑。開發後滯。則有法華釋籤。法華疏記。各十卷。止觀輔行傳宏訣十卷。法華三昧補助儀一卷。方等懺補闕儀二卷。略維摩疏十卷。維摩疏記三卷。重治定涅槃疏十五卷。金錍論一卷。及止觀

義例止觀大意止觀文句十妙不二門等盛行於世。詳其然師始天寶終建中以自證之心說未聞之法。經不云乎云何於少時大作佛事然師有焉其朝達得其道者唯梁肅學士故摛鴻筆成絕妙之辭彼題目云嘗試論之聖人不興其間必有命世者出焉。自智者以法傳灌頂頂再世至於左溪明道若昧待公而發乘此寶乘煥然中興蓋受業身通者三十有九僧縉紳先生高位崇名屈體承教者又數十人師嚴道尊遐邇歸仁向非命世而生則何以臻此觀夫梁學士之論擬議偕齊非此人何以動鴻儒非此筆何

以銘哲匠。蓋洞入門室。見宗廟之富。故以是研論矣。吁。吾徒往往有不知然之道。詩云。維鵲有巢。維鳩居之。梁公深入佛之理窟之謂歟。有會稽法華山神邕作真讚。至大宋開寶中。吳越國王錢氏追重而誄之。號圓通尊者焉。可不是歟。

唐蘇州開元寺元浩傳

釋元浩。姓秦氏。字廣成。吳門人也。綺歲依晉陵靈山寺慧日禪師出家。具滿律戒。配本州龍興寺。尋爲荆溪湛然禪師囑累弟子。初受法華止觀。已得醍醐。唯以裂大網。感大果。成大行。歸大處。以爲大願。宴居三

昧常隨佛後。希夷自得。人莫能知。其祕密深遠如海。印三昧。不言出處。常行佛事。與夫難行苦行更相祖述。默傳心要。爲論爲記。靈芝瑞草。以爲功德。傳於後世者。不同日而語矣。浩注解大涅槃經。爲文首序。德美圓實。志願顯現。蓋錄其所證之意。而見於文曰。余聞先覺之大寶曰常。在宥布和之盛典曰教。率土知化之歸宗曰行。交感人心之至極曰證。然則以道御時。以法性合其運。當應物之際。與顯晦同其光。恢張至化而自他昭著者。實播於鴻名。欽恭聞思。協和至極。四德克彰者。實存乎妙體。格變羣家。厯觀諸行。至

典克修。庶績有成者。實賴乎宗本。信以授人大明宗
極。敷暢厥旨。庶幾有補於將來者。實存乎妙用。博綜
羣言以立誠訓。風行十方。率用歸順者。實存乎妙教
矣。此浩之法要。如王輔嗣之法繫辭。司馬遷之自敘。
管仲能言輕重。孟子之傳春秋。雖儒釋不同。其義一
也。以元和十二年十一月十一日示疾。右脇累足入
於涅槃。非二乘境界。真如來定也。明年十一月十三
日。閣維起塔於蘇州西北虎丘東山南原也。浩耽學
味道。不涉餘事。常隨然師。聽其言說。曾無倦色。分枿
義理。派流川注。必默記而暗誦。一言不失。數年之後

人始知之。然師曰。回也如愚。罕爲人說。多辭以不能。及被梁田二君苦勸請之。始著涅槃經解述。浩與上都雲華寺華嚴澄觀法師。若孔門之游夏焉。其儒流受業。翰林學士梁公肅。蘇州刺史田公畋。緇流受業者。智恆子瑜。道儒仲儀。仲良五人。持經講論。傳之無窮。大比正尼。識爲道異。志真悟極。此四人者。高潔之倫。深練禪觀。初浩爲二官所請。注經預夢甚爲奇特。又庭階生花。非人間恆所見者。祥鳥飛馴。五彩絕異。刺史崔恭撰塔碑。立於虎正山羅漢石壇之左。後有行滿道暹明曠。皆著述廣天台之道歟。

唐越州暨陽杭烏山智藏傳

釋智藏。姓皮氏。西印度種族。祖父從華。世居官宦。後僑寓廬陵。藏少入精舍。覩像設之繁。乃陋俗求真。而於三學各所畱心。唯律藏也。最爲精敏。大厯三年。遊豫章。因隸名天宮寺。眾懇命臨壇秉度。時仰包然號爲律虎。每登法座。提唱毗尼。堂盈席滿。聽受無厭。辯名理。析微言。連環可解也。貞元中。遇大寂禪師。篤明心要。及遊會稽。於杭烏山頂。築小室安禪。乃著華嚴經妙義。宣吐亹亹。學者歸焉。至元和十四年二月。無疾而終。報齡七十九。焚收舍利圓淨者。建塔於院北。

峯焉。杭烏山者。越俗言譌。合言杭嶋。謂浙江所渡。古用杭筏。到岸藏杭。故云嶋也。

唐梓州慧義寺神清傳

義將

釋神清。字靈庾。俗姓章氏。綿州昌明人也。生於大安山下。昆季相次三人。出俗皆有名望。清居乎仲。處胎之際。母頓惡葷羶。及爲兒。雖隨戲弄。遇像禮足。逢僧稽顙。年十三。受學於綿州開元寺辯智法師。於時敕條嚴峻。出家者限念經千紙。方許落髮。清卽誦法華維摩楞伽佛頂等經。有同再理。時故相喬琳爲綿郡太守。驚其幼俊。躬而降禮。請削染焉。則大厯中也。至

年十七聽習麤通卽講法華一經。歲滿慧義寺依如
律師受具戒。夏習尸羅。依學新疏。尋達大宗。乃詣上
都。後以優文贍學。入內應奉。暮年鍾其茶蓼。歸慧義
寺。講導著述。略無閒日。以元和年中終於本寺峯頂。
遷神於白門蘭若。卽鄴城北郛外也。清平昔好爲著
述。喜作編聯。蓋巨富其才。亦鑿深於學。三教俱曉。該
玄鑒極。彝倫咸敘。萬人之敵也。受業弟子黑白四方。
計一千餘人。前後撰成法華玄箋十卷。釋氏年誌三
十卷。新律疏要訣十卷。亦謂清鈔。二眾初學儀一卷。
有宗七十五法疏一卷。亦名法源記。此蓋解小乘所

計五位。色心心所。不相應。無爲等法。體性業用。一皆詳括。故云法源也。識心論。澄觀論。俱舍義鈔數卷。北山參玄語錄十卷。都計百餘軸。並行於代。就中語錄博該三教。最爲南北鴻儒名僧高士之所披翫焉。寺居鄴城之北。長平山陰。故云北山。統三教玄旨。實而爲錄。故云參玄也。觀清之述作。少分明二權一實之經旨。大分明小乘律論之深奧焉。清貌古且奇。皙白而光瑩。相國崔龜從時。從事東川。序真讚云。與奘三藏道顏同。攝物異時一體耳。門人數多其出倫者。義將也。獨明俱舍。兼善起信。海內學人望風而至。開成

中。北山俱舍宗不泯者清之餘素乎。東川涌潭僧正顏公著碑。本寺講律臨壇光肇。別附語錄略記。清言行矣。

唐京師大安國寺端甫傳

釋端甫。俗姓趙氏。天水人也。世爲秦著姓焉。初母張夫人夢梵僧謂曰。當生貴子。卽出囊中舍利使吞之。及誕。所夢僧白晝入其室。摩其頂曰。必當大興法教。言訖而滅。旣成人。高顙深目。大頤方口。長六尺五寸。其音如鐘。夫將欲荷如來之菩提。鑿生靈之耳目。固必有殊祥奇表歟。始十歲。依崇福寺道悟禪師爲沙

彌十七正度爲比丘。隸安國寺。受具於西明寺。照律師。學毗尼於崇福寺。昇律師。傳唯識於安國寺。素法師。通涅槃經於福林寺。峯法師。甫又夢梵僧以舍利滿瑠璃器使吞之。且曰。三藏大教盡貯汝腹矣。自是經律論無敵於當時。囊括川注逢源。會委滔滔。然莫能濟其畔岸矣。夫將欲伐株杌於情田。雨甘露於法種者。固必有勇智宏辯歟。無何謁文殊於清涼。眾聖皆現。演大經於太原。傾都畢會。德宗皇帝聞其名徵之。一見大悅。常出入禁中。與儒道議論。賜紫方袍。歲時錫施異於他等。復詔侍皇太子於東朝。順宗皇帝

深仰其風。親之若昆弟。相與臥起。恩禮特隆。憲宗皇帝數幸其寺。待之若賓友。常承顧問。注納偏厚。而甫符彩超邁。辭理響捷。迎合上旨。皆契真乘。雖造次應對。未嘗不以闡揚爲務。繇是天子益知佛爲大聖人。其教有大不思議事。當是時朝廷方削平區夏。縛吳幹蜀。瀦蔡蕩鄆。而天子端拱無事。詔甫率緇屬迎真骨於靈山。開法場於祕殿。爲人請福。親奉香燈。旣而刑不殘。兵不黷。赤子無愁聲。滄海無驚波。蓋參用真宗以毗大政之明效也。夫將欲顯大不思議之道。輔大有爲之君。固必有冥符玄契歟。掌內殿法儀錄左

街僧事。以標表淨眾者。凡一十年。講涅槃唯識經論。處當仁傳授宗主。以開誘道俗者。凡一百六十座。運三密於瑜伽。契無生於悉地。日持諸部十餘萬徧指淨土爲息肩之地。嚴金經爲報法之恩。前後供施數十百萬。悉以崇飾殿宇。窮極雕繪。而方丈單牀。靜慮自得。貴臣盛族。皆所依慕。豪俠工賈。莫不瞻嚮。薦金寶以致誠。仰端嚴而禮足。日有千數。不可殫書。而甫卽眾生以觀佛。離四相以修善。心下如地。坦無正陵。王公輿臺。皆以誠接。議者以爲成就。常不輕行者。唯甫而已矣。夫將欲駕橫海之大航。拯迷途於彼岸者。

固必有奇功妙道歟。以開成元年六月一日西向右脇而滅。當暑而尊容若生。終夕而異香猶鬱。其年七月六日。遷於長樂之南原。遺命茶毘得舍利三百餘粒。方熾而神光月皎。旣燼而靈骨珠圓。賜諡曰大達。塔曰玄祕。俗壽六十七。僧臘可數。門弟子僧尼約千餘輩。或講論玄言。或紀綱大寺。修禪秉律。分作人師。五十其徒皆爲達者。會昌中。相國裴公休爲碑頌德焉。

唐圭峯草堂寺宗密傳

圓禪師
照禪師

釋宗密。姓何氏。果州西充人也。家本豪盛。少通儒書。

欲干世以活生靈。負俊才而隨計吏。元和二年偶謁
遂州圓禪師。圓未與語。密欣然而慕之。乃從其削染
受教。此年進具於拯律師。尋謁荆南張。張曰。汝傳教
人也。當宣導於帝都。復見洛陽照禪師。照曰。菩薩人
也。誰能識之。末見上都華嚴觀。觀曰。毗盧華嚴能隨
我遊者。其唯汝乎。初在蜀。因齋次受經。得圓覺十二
章。深達義趣。誓傳是經。在漢上。因病僧付華嚴句義。
未嘗隸習。卽爾講之。由是乃著圓覺華嚴及涅槃金
剛起信唯識孟蘭盆法界觀行願經等疏鈔。及法義
類例禮懺修證圖傳纂略。又集諸宗禪言爲禪藏總

而序之。并酬荅書偈議論等。又四分律疏五卷。鈔懸
談二卷。凡二百許卷。圖六面。皆本一心而貫諸法。顯
真體而融事理。超羣有於對待。冥物我而獨運矣。密
累入內殿。問其法要。大和二年慶成節。徵賜紫方袍。
爲大德。尋請歸山。會昌元年正月六日。坐滅於興福
塔院。儼若平日。容貌益悅。七日遷於函。其自證之力
可知矣。其月二十二日。道俗等奉全身於圭峯。二月
十三日。茶毗得舍利數十粒。明白而潤大。後門人泣
而求諸煨中。必得而歸。悉斂藏於石室。其無緣之慈
可知矣。俗齡六十二。僧臘三十四。遺誠令昇屍施鳥。

獸焚其骨而散之。勿塔。勿得悲慕。以亂禪觀。每清明上山。必講道七日而後去。其餘住持儀則。當合律科。違者非吾弟子。初密道旣芬馨。名惟烜赫。內眾慕羶。旣如彼。朝貴荅響又如此。當長慶元和已來。中官立功執政者。孔熾。內外猜疑。人主危殆。時宰臣李訓。酷重於密。及開成中。僞甘露發。中官率禁兵五百人出閣。所遇者一皆屠戮。時王涯。賈餗。舒元興。方在中書會食。聞難作。奔入終南投密。唯李訓欲求翦髮匿之。從者止之。訓改圖趨鳳翔。時仇士良知之。遣人捕密入左軍。面數其不告之罪。將害之。密怡然曰。貧道識

訓年深亦知其反叛。然本師教法遇苦卽救。不愛身命。死固甘心中尉魚恆志嘉之。奏釋其罪。朝士聞之。扼腕出涕焉。或曰。密師爲禪耶律耶經論耶。則對曰。夫密者。四戰之國也。人無得而名焉。都可謂大智圓明。自證利他大菩薩也。是故裴休論撰云。議者以師不守禪行。而廣講經論。遊名邑大都。以興建爲務。乃爲多聞之所役乎。豈聲利之所未忘乎。嘻。議者焉知大道之所趣哉。夫一心者。萬法之總也。分而爲戒定慧。開而爲六度。散而爲萬行。萬行未嘗非一心。一心未嘗違萬行。禪者六度之一耳。何能總諸法哉。且如

來以法眼付迦葉。不以法行。故自心而證者爲法。隨願而起者爲行。未必常同也。然則一心者。萬法之所生。而不屬於萬法。得之者。則於法自在矣。見之者。則於教無礙矣。本非法。不可以法說。本非教。不可以教傳。豈可以軌迹而尋哉。自迦葉至富那奢。凡十祖。皆羅漢。所度亦羅漢。馬鳴龍樹提婆天親。始開摩訶衍。著論釋經。摧滅外道。爲菩薩唱首。而尊者闍夜獨以戒力爲威神。尊者摩羅獨以苦行爲道跡。其他諸祖。或廣行法教。或專心禪寂。或蟬蛻而去。或火化而滅。或攀樹以示終。或受害而償債。是乃法必同而行不

必同也。且循轍跡者非善行。守規墨者非善巧。不迅疾無以爲大牛。不超過無以爲大士。故師之道也。以知見爲妙門。寂淨爲正味。慈忍爲甲盾。慧斷爲劒矛。破內魔之高壘。陷外賊之堅陣。鎮撫邪襍。解釋縲籠。遇窮子則叱而使歸其家。見貧女則呵而使照其室。窮子不歸。貧女不富。吾師恥之。三乘不興。四分不振。吾師恥之。忠孝不並化。荷擔不勝任。吾師恥之。避名滯相。匿我增慢。吾師恥之。故遑遑於濟拔。汲汲於開誘。不以一行自高。不以一德自聳。人有依歸者。不俟請則往矣。有求益者。不俟憤則啓矣。雖童幼不簡於

應接。雖驚。很不怠於叩勵。其以闡教度生。助國家之化也如此。故親師之法者。貧則施。暴則斂。剛則隨。戾則順。昏則開。慳則奮。自榮者慊。自堅者化。徇私者公。溺情者義。凡士俗有捨其家。與妻子同入其法。分寺而居者。有變活業。絕血食持戒法。起家爲近住者。有出而修政理。以救疾苦爲道者。有退而奉父母。以豐供養爲行者。其餘憧憧而來。欣欣而去。揚袂而至。實腹而歸。所在甚眾。不可以紀。真如來付囑之菩薩。眾生不請之良友。其四依之人乎。其十地之人乎。吾不識其境界。庭宇之廣狹深淺矣。議者又焉知大道之

所趣哉。其爲識達大人之所知心爲若此也。密知心者多矣。無如昇平相國之深者。蓋同氣相求耳。宣宗再闡眞乘。萬善咸秩。追謚曰定慧禪師。塔號青蓮。持服執弟子禮。四眾數千百人矣。

系曰。河東相國之論譔。所謂極其筆矣。然非夫人之爲極筆。於他人豈極其筆乎。觀夫影響相隨。未始有異也。影待形起。響隨聲來。有宗密公。公則有裴相國。非相國曷能知密公。相續如環。未嘗告盡。其二公之道如然。則知諦觀法王法。則密公之行甚圓。應以宰官身。則裴相之言可度。今禪宗有不達。而譏密不宜。

講諸教典者。則吾對曰。達磨可不云乎。吾法合了義教。而寡學少知。自旣不能。且與煩惑相應。可不嫉之乎。或有誚密不宜接公卿。而屢謁君王者。則吾對曰。教法委在王臣。苟與王臣不接。還能興顯宗教以不。佛言力輪王臣是歟。今之人情。見近王臣者。則非之。曾不知近王臣人之心。苟合利名。則謝君之誚也。或止爲宗教親近。豈不爲大乎。寧免小嫌。嫌之者。亦嫉之耳。若了如是義。無可無不可。吁哉。

唐京師西明寺乘恩傳

釋乘恩。不知何許人也。肇從志學。知遍尋師。凡厠黌

堂必窮義路。常訓門人曰。好學近乎智。力行近乎仁。仁智稍成。是殊名同實。趨菩薩地。若下坂之走丸耳。恩樂人爲學。不忘講導。及天寶末。關中版蕩。因避地姑臧。旅泊之間。嗟彼密邇羌虜之封。極尙經論之學。恩化其內眾。勉其成功。深染華風。悉登義府。自是重撰百法論疏并鈔。行於西土。其疏祖慈恩而宗潞府。大抵同而少聞異。終後弟子傳布。迨咸通四年三月。中。西涼僧法信。精研此道。稟本道節度使張義朝。表進恩之著述。敕令兩街三學大德等詳定。實堪行用。敕依。其僧賜紫衣。充本道大德焉。

唐彭州丹景山知玄傳

釋知玄。字後覺。姓陳氏。眉州洪雅人也。曾祖圖南。任梓州射洪縣令。祖憲。考邈。皆名場不捷。母魏氏。夢月入於懷。因而載誕。雖乳哺未能言。見佛像僧形。必含喜色。五歲。祖令詠花。不數步成云。花開滿樹紅。花落萬枝空。唯餘一朵在。明日定隨風。祖吟歎。不懌曰。吾育此孫。望其登甲科。雪二代之恥。今見孺子志矣。非貽厥也已。必從空門。乖始望也。七歲。果遇法泰法師。在寧夷寺講涅槃經。寺與居鄰。玄日就講集所。一聆法語。若覩前因。是夕夢其寺殿佛手摩其頂。寤啓祖。

父乞爲勤策。親黨觀其必不可抑奪。故聽之。年十一。遂其削髮。乃隨師詣唐興邑四安寺。授大經四十二卷。遠公義疏。誓空師圓旨。共一百二十五萬言。皆囊括深奧矣。方年十三。指擿緇徒。露老成之氣。時丞相杜公元穎作鎮西蜀。聞玄名。命升堂講談於大慈寺。普賢閣下。黑白眾。日計萬許人。注聽傾心。駭歎無已。自此蜀人弗斥其名。號陳菩薩耳。傳云。玄前身名知鉉。漢州三學山講十地經。感地變瑠璃焉。玄於淨眾寺。辯貞律師所受具戒。纔聽毗尼續通俱舍。則長十山固律師之付授焉。復從本師下三峽。厯荆襄。抵於

神京資聖寺。此寺四海三學之人。會要之地。玄敷演
經論。僧俗仰觀。戶外之屨。日其多矣。文宗皇帝聞之。
宣入顧問。甚愜皇情。後學唯識論於安國信法師。又
研習外典。經籍百家之言。無不該綜。玄每恨鄉音不
堪講貫。乃於象耳山誦大悲呪。夢神僧截舌換之。明
日俄變秦語矣。有楊茂孝者。鴻儒也。就玄尋究內典。
直欲效謝康樂。注涅槃經。多執卷質疑。隨爲剖判。致
書云。方今海內龍象。非師而誰。次楊刑部汝士高左
丞元裕長安楊魯士。咸造門擬結蓮社。嘗一日。玄宴
坐。見茂孝披紫服戴碧冠。三禮畢。乘空而去。玄令人

偵問茂孝其夕誠其子曰。吾常欲落髮披緇。汲瓶挈
屨侍玄公。所累者簪冕也。吾蓋棺時。殮以紫袈裟。碧
芙蓉冠。至是方驗先見矣。武宗御宇初。尙欽釋氏。後
納蠱惑者議。望祀蓬萊山。築高臺以祈羽化。雖諫官
抗疏。宰臣屢言。終不迴上意。因德陽節。緇黃會麟德
殿。獨詔玄與道門敵。言神仙爲可學。不可學耶。帝又
手付老氏中。理大國若烹小鮮義。共黃冠往復。玄陳
帝王理道教化根本。言神仙之術。乃山林閒匹夫獨
擅高尙之事業。而又必資宿因。非王者所宜。辭河下
傾。辯海橫注。凡數千言。聞者爲之股慄。大忤上旨。左

右莫不色沮。左護軍仇士良。內樞密楊欽義。惜其才
辯。恐將有斥逐之命。乃密諷貢祝堯詩。玄立成五篇。
末章云。生天本自生天業。未必求仙便得仙。鶴背傾
危。龍背滑。君王且住一千年。帝覽詩微解。帝雖不納
忠諫。而嘉其識見。口給也。玄卽歸巴岷舊山。例施巾
櫛。而存戒檢。愈更甄明。方扁舟入湖湘閒。時楊給事
漢公廉問桂嶺。延止開元佛寺。屬宣宗龍飛。楊公自
內樞統左禁軍。以冊定功高。請復興天竺教。奏乞訪
玄聲迹。玄復掛壞衣歸上國寶應寺。屬壽昌節講讚。
賜紫袈裟。署爲三教首座。帝以舊藩邸造法乾寺。詔

玄居寺之玉虛亭。大中三年誕節。詔諫議李貽孫給事楊漢公。緇黃鼎列論義。大悅帝情。因奏天下廢寺基。各敕重建。大興梵刹。玄有力焉。命畫工圖形於禁中。其優重如是。與相國裴公休友善。同激揚中興教法事。八年上章乞歸故山。大行利濟。受益者多。廣明二年春。僖宗遘難西蜀。後遣郭遵泰齎璽書。肩輿詔赴行在。帝接談論。頗解上心。左軍容田令孜與諸達官問道勤重。帝欲旌其美。令諸學士撰玄師號。皆未愜旨。乃揮御翰云。朕以開示悟入法華之宗旨也。悟者覺也。明也。悟達大道。悟佛知見。又云悟者一刹那。

不悟河沙劫。所以悟者真乘。了然成佛之義。今賜悟
達國師爲號。雖曰強名。用表朕意。玄陳讓不遂。乃乞
歸九隴舊廬。於正月二十一日。臥內見所曾遊歷聖
境名跡。皆見在前。二月七日。聞空聲曰。必生淨土。乃
訊之云。孰之語耶。空又應曰。佛也。七月中。聞戶外有
格鬬之聲。逡巡一菩薩降於庭前。事摩滅矣。漸迫近
玄身。丁寧讚喻。勿以此苦爲累也。言訖而沒。又於一
夕。有一珠自玄左足下流去。苦楚萬端。諦視其珠中。
明明有晃錯二字。乃知玄是袁盎也。曾因七國反。盎
奏斬錯以謝吳楚諸王。故爲嬰撓耳。召弟子慈燈。附

口上遺表。囑令棄屍半飼魚腹。半啗鳥獸。吾久與西方淨土有期。如斯誣諉。訖。右脅面西而逝。享年七十三。僧臘五十四。玄咸通中。曾遊澤州。追問小遠法師。同年亦同終。日月焉。玄堅守禁戒。少欲。過中不食蔬果。服唯布褐。臥則芻秆。而六時行道。夜臥一更餘。則禪坐。等視眾生。無貴賤。少長待之如一。素結情好深者。裴相國休。初裴鎮荊門。玄遊五臺山。路出渚宮。贈遺初無所取。裴知其儉約。密遣人沿路以供之。若蘇秦遣舍人陰資奉張儀也。嘗經駱谷。真符縣雍氏家枕潭。潭中有大魚。如龍四足而齒牙纖利。其家日飼

以食已四世矣。或欲網釣之意。則輒雲霧晦冥焉。玄扣船撫其頂。瞪目而鼓躍。卽爲受歸依。未幾乃寄夢雍氏曰。我謝汝累世護念。今受歸依。已生天而永訣矣。次爲導江玉壘山神李冰廟。益昌北郭龍門神。偕受戒法。罷其血食歟。有李商隱者。一代文宗。時無倫輩。常從事河東柳公梓潼幕。久慕玄之道學。後以弟子禮事玄。時居永崇里。玄居興善寺。義山苦眼疾。慮嬰昏瞽。遙望禪宮。冥禱乞願。玄明旦寄天眼偈三章。讀終疾愈。迨乎義山臥病。語僧錄僧徹曰。某志願削染爲玄弟子。臨終寄書偈決別云。玄生常著如來藏。

經會釋疏二卷。命僧徹撰法鑑以照像若十翼焉。大
無量壽經疏二卷。僧徹著法燈類章指焉。勝鬘經疏
四卷。僧徹著法苑以錯綜。猶緯書焉。又般若心經金
剛經各有疏義。此外秦蜀之間作釋氏禰文外篇。箴
論碑誌歌詩。錄成二十餘卷。禮懺文六卷。通計三十
萬言。後遷塔於茶籠山附聖寺矣。中和二年弟子左
街僧錄淨光大師僧徹述傳。法孫右街僧錄覺輝。輝
弟子僞蜀祐聖國師重孫光業。僧錄綿綿瓜瓞。皆名
公也。鳳翔府寫玄真。李義山執拂侍立焉。
系曰。玄公何云袁盎。又爲知鉉。二人後身耶。通曰。人

壽百年。自漢至唐。玄幾經出沒乎。骸山淚海。斷可知矣。然則玄公多才行道。近古罕聞。法嗣蕃昌。他莫與議也。

唐京兆大安國寺僧徹傳

釋僧徹。不知何許人也。敏利天資。高邁逸類。稚歲聰穎。而慕悟達國師。若顏回之肖仲尼也。旣而時親函丈。頗有幽微。隨侍翼從。未嘗少厭。窺其門牆。其殆庶幾乎。悟達凡有新義。別章咸囑。付徹暢衍之。爲如來藏經疏。著法鑑四卷。大無量壽經疏。著法燈二卷。勝鬘師子吼經疏。著法苑十卷。觀乎悟達爲疏。若左丘

明之傳也。徹述三法鈔。猶杜服之集解歟。初居法乾內寺。師資角立。聲彩風行。凡百官寮無不奉仰。率由徹內外兼學。辭筆特高。唱子和汝同氣相求。尋充左右街應制。每屬誕辰。升麟德殿法座講談。敕賜紫袈裟。懿宗皇帝畱心釋氏。頗異前朝。遇八齋日。必內中飯僧數盈萬計。帝因法集。躬爲讚唄。徹則升臺朗詠。寵錫繁博。敕造梅檀木講座以賜之。又敕兩街四寺行方等懺法。戒壇度僧各三七日。別宣僧尼大德二十人。入咸泰殿置壇度內福壽寺尼。繕寫大藏經。每藏計五千四百六十一卷。雕造真檀像一千軀。皆委

徹檢校焉。以十一月十四日延慶節。麟德殿召京城僧道赴內講論。爾日徹述皇猷。辭辯瀏亮。帝深稱許。而又恢張佛理。旁懾黃冠。可謂折衝異論者。當時號爲法將。帝悅。敕賜號曰淨光大師。咸通十一年也。續錄兩街僧事。初徹經江論海。勇於揭厲。於青龍寺講貫。旣循悟達國師義意。寄呈所見。蒙迴八十四字云。觀君法苑思沖虛。解我真乘刃有餘。若使龍光時可待。應憐僧肇論成初。五車外典知難敵。九趣多才恐不如。蕭寺講軒橫淡蕩。帝鄉雲樹正扶疎。幾生曾得闍跢意。今日堪將貝葉書。一振微言冠千古。何人執

卷問吾廬。覽茲獎飾悲喜盈襟。以廣明中巢寇犯闕。僖宗幸蜀。其夕徹內宿。明日倉黃與杜光庭先生扈從入於岷峨。再見悟達。痛序艱難。徹極多著述。碑頌歌詩。不知所終。內翰侍郎樂朋龜為真讚。鳳翔嘉州皆寫其真相。弟子秦蜀之間。愈多傳法者。

高僧傳三集卷第六 終

音釋

慤

苦角切

馮翊

馮披冰切翊余翊郡名

漪

於其切瀾漪水波文也

蕤

佳儒

切蕤蕤草木盛貌

狻猊

狻素官切猊研奚切狻即師子也

錚

波為切

枿

先擊切剖

也 𧄸

無匪切𧄸𧄸不倦之意

荼蓼

荼同都切蓼力小切荼蓼辛苦之菜故以為多難之

喻也 **皙** 思積切 白色也 **釜** 宜金切 耶州名 **餽** 思穀切 **扼腕** 扼乙切

握也 腕烏貫 **縲** 力追切 黑索也 **驚** 疑到切 與 **憧** 昌容切 憧行不絕

貌 **黷** 戶盲切 學舍也 **懌** 羊益切 悅也 **斥** 昌石切 指也 **鉉** 胡犬切 愜苦協

也 **偵** 癡貞切 邏伺也 **忤** 五故切 違戾也 **櫛** 側瑟切 梳枇 **甄** 居延切 察也

錯 倉各切 **盜** 於浪切 徒感切 **誣** 誣之瑞切 誣女恚 **誣** 誣以言相囑

累也 **蒨** 蒨窗隅切 蒨古 **瞪** 澄應切 大結切 **瞞** 瓜蔓也 **懾** 涉

也切懼

高僧傳三集卷第七

宋左街天壽寺通慧大師賜紫沙門贊寧等

奉敕撰

義解篇第二之四

正傳二十三人附見四人

唐五臺山華嚴寺志遠傳

元堪

釋志遠。俗姓宋氏。家於汝南。其父早喪。孤侍孀親。承顏之禮。匪遑晨夕。母常念法華經。精通五卷。遠識度明敏。孤標卓然。年二十八。辭親從師。歸依荷澤宗風。晤解幽旨。經營僧事。聯綿六秋。凡諸取給。未嘗混互。自爾辭師尋禮。復經八年。雖博瞻兩宗情。猶繫滯聞。

天台一枝該通妙理。定慧雙融。解進於行。十乘境觀。起自一家。修性三德。清涼盛演。因命同輩。追遊五峯。棲遁林泉。履歷前躅。曉六凡四聖之理。了開示悟入之門。百界千如。包羅性相。卽遮卽照。破立同時。依正圓融。凡聖平等。豁開心目。物我雙亡。僅四十年。闡揚獨步。遠業精道。邈志苦神。和臥不解衣。食非別請。時歲不稔。樵炊屢乖。每掬水漱流。將期永日。體有瘡疥。手不塗摩。戒檢遵修。警慎心口。常以四種三昧。鍊磨身心。至於緘札題尺。頗閒辭翰。蟲篆之美。每有緇素負才學者。異其辯說。或傍搜僻隱。欲爲挫銳。伺之瑕。

玷求其勝負。進雖傲然踞席。退乃踧踖赧容。來高我山。去隨四悉。洎會昌四年。春秋七十七。僧臘四十八。忽絕食數朝。而說法罔憚。以二月十七日。誡門人曰。吾自生修進。不欺心口。今獲二種果報。臥安覺安。而無痛惱。又曰。天台宗疏務在宣傳。法華疏十卷。本迹二門。三周記別。開近顯遠。玄文十卷。五義判釋。止觀十卷。境觀雙修。不定頓漸。八教麤妙。遮照平等。行解圓明。一多相卽。一藏文句。瑩玉撝金。將踐聖階。降茲罕及。禮懺方等。必假精誠。志之永懷。副吾之意也。於時龍象雲萃。櫛比座隅。咸讚希奇。同稱佛號。慈誨之。

際奄至遷靈。風慘雲愁。山昏水咽。林巒色變。徒屬棲傷。閣維日諸子奔馳。罔知所詣。雖學者如林。達其法者唯元堪。卽扶風馬氏之裔也。氣度沖邃。道風素高。蓋遠傾其解脫之瓶。注以醍醐之器。可謂一燈之後。復然一燈。及武宗澄汰之際。稟師先旨。哀慟累夕。以其章疏文句。祕之屋壁。及宣宗再闡釋門。重葺舊居。取其教部。置之影堂。六時經行。儼若前製。法華妙經。積歲傳唱。摩訶止觀。久而敷揚。嗣繼之心。已極師資之禮也。

唐越州應天山寺希圓傳

釋希圓。姓張氏。姑蘇人也。宗親豪富而獨捨家。從登戒法。便遊講肆。不滯一方。勤修三學。良深歲稔。尤至博通。時推俊邁。因命講訓。光啓中。屬徐約軍亂。孫儒略地吳苑。俶擾。圓由通玄寺。附商船避地於甬東。其估客偕越人也。篤重於圓。召居會稽寶林山寺。形雖么麼。性且強幹。與時寡合。多事宴默。或問之。則曰。吾逍遙乎無形之場。同師子遊戲耳。景福中。於山寺演暢經論。同聲相應。求法者至。乃著玄中鈔數卷。皆當義妙辭也。恆勸人急修上生之業。且曰。非知之難。行之爲難。汝曹勉旃。圓六時禮懺。未嘗少缺。居小房。卽

瑯琊山頂。是山也。傳云。從瑯琊臺飛來。此處先是屠坊。故皆鎮於其下。山之家有井。井有鰻鯪焉。水有應縮。應大江之潮候。甚多靈怪。一云此處禹鑿浙江蛟蜃之屬。其名曰蛆。蛆有雙耳。其色蒼黃。或緣竹木。必風雨至矣。今或出石竅。入僧居溝渠中。見人不驚。握則跳梁如怒狀。唯徧入圓房。圓手執宛轉屑就。乃爲之受歸戒。令勿作風雹之妖。暨圓終而多暴風雨也。圓之修習。願見彌勒。一日講次。屹然坐。終於法座。時眾聞異香裊裊。天樂錚鏦。或絕或連。七日後已。此真上生之證歟。則乾寧二年四月也。還山之日。僧眾置

祭於寺門。無何有人。茜袍象笏。拜跪愴然。愀怳之間。杳無蹤迹。眾莫能測焉。茶毗收舍利七百餘粒。被四明人齋往新羅國矣。

唐絳州龍興寺木塔院玄約傳

釋玄約。姓張氏。正平人也。志韻剛潔。幼萌出塵之心。旣諧夙志。入州龍興伽藍。日誦千言。更無再受落髮之後。滿足律儀。檢察己心。循其戒範。精持止作。未嘗穿穴。自茲名節。頓高流輩。窺仰數稔之間。律論俱瞻。徧求知識。探蹟玄文。戾止長安崇聖寺。以戒德之選。而預臨壇講律。并俱舍共四十餘徧。淵靜其性。研覈

靡虧著俱舍論金華鈔二十卷。爲時所貴。而二講登席可三百餘人。皆北面受業焉。傳稟門生一百許輩。汾沁之間奔走學者。迨乎老矣。終本院小房。俗壽七十六。法臘五十六。學法弟子道俗收焚阬舍利數百粒。構輒浮圖於郡城之西焉。

梁滑州明福寺彥暉傳

釋彥暉。姓孫氏。今東京陽武縣人也。佩觿之歲。聞父讀金剛般若。瞪目凝聽。澹然歡喜。又屬家內齋僧磬梵俱作。於簾幕之下合掌欣然。登年十五。隨師學法。往太原京兆洛陽聽采忘勞。年滿於嵩山少室寺受

大戒。隸習毗尼。頗通深趣。次尋經論。皆討玄源。且曰。爲善不同。同歸乎治。治則戒定慧也。入聖機械。此三治性之極致也。屈洛都先達。無不推伏。至乎四部。悉仰柔明。臨鑑則戚少欣多。執瓶則荷輕持重。三衣之外。百一之資。量足而供。更無餘長。所行慈忍。匪事規求。不畜門徒。惟勞自己。勤勤化導。默默進修。是故南燕之人。號爲佛子。初寄明福寺。講百法論也。四海英髦。風趨波委。恆溢百餘。且多俊邁。精研論席。鑽仰經宗。其閒碩學兼才。故有分爲上下十惡。十惡者。若八伯之號焉。上十惡則洞閒性相。高建法幢。宗因喻三。

立破無滯。下十惡則學包內外。吟詠風騷。擊論談經。聲清口捷。讚揚梵唄。表白導宣。蓋因題目之分。乃極才能之際。云惡則倒背之言。乃是極善也。其門弟子爲若此也。暉因明百法二論。各講百許遍。出弟子一百五十餘人。著鈔曰滑臺。盛行於世。以乾化元年秋八月三日。氣力薨然。而奄化矣。春秋七十二。法臘五十二。滑人追慕其德。二眾三百餘人。奉神柩歸葬於陽武縣側。營小塔焉。

梁東京相國寺歸嶼傳

釋歸嶼。姓湄氏。壽春人也。父元旭。知子敏利。授以詩

書。誦覽記憶。彌見過羣從諸子。而竊願出塵。父母允其頻請。乃禮本郡開元寺道宗律師爲力生焉。未及周星。念通法華仁王二經。登於弱冠。而全戒足。矜持三行。靡曠四儀。習聽新章寺通講授。後聞洛京三輔經論盛行。結侶求師。僅於十載。疏通性相。精大小乘。名數一支。因明一學。俱舍唯識。維摩上生。皆深藏若虛也。復往南燕。就暉公重覆所學。研朱益丹。猶慨義章未爲盡善。乃之今東京相國寺。遂糅新鈔。講訓克勤。門生領悟。時朱梁後主與嶼卅角同學庠序。狎密情濃。隔面年深。卽位半載。下詔訪之。嶼雖知故舊。終

歲不言事不可逃。應召方入。帝見悲喜交集。宣資豐厚。時屬嘉慶節。曾下敕止絕天下薦僧道恩命。其年獨賜嶼紫衣。仍號演法大師。兩街威儀仰導至寺。兼敕東塔御容院爲長講院。時閩帥以聖節進金剛經一藏。絹三百匹。盡賜嶼焉。法侶榮之。然覩舊鈔有所不安。未極其理。遂搜抉精義於三載。著成二十卷。號曰會要草字。寫畢進呈。帝覽賞歎。敕令入藏。嶼苦辭乃止。如是十五年中。唱導無怠。學徒繼榮。瞻公相繼傳持。至後唐清泰三年十月十日。謂門人洪演曰。余氣力憊然。無常將至。汝好住修進。焚香合掌。初夜長。

逝。春秋七十五。僧臘五十五。卽以其月十八日遷塔於京東郊寺莊東岡焉。

後唐洛陽長水令諲傳

釋令諲。姓楊氏。陝府閩鄉人也。幼而履操。迴求出俗。得本邑之師。授淨名經。年旣應法。乃納戒津。大小乘教兼而學之。於名數法門。染成淳粹。彌陀中觀。幹及膏腴。聲光振發。莫之與京。因遊洛南長水。遇歸心檀信。構伽藍。就中講貫一論一經。三十載中宣化。計各五十餘徧。日別誦維摩上生。以爲恆課。執行持心。而絕瑕類。遠近宗承。若望梅者得飲焉。以清泰二年乙

高僧傳三集卷十
未歲終於邑寺。春秋七十一。法臘五十一。其年遷於山麓。徇西域法。火葬。獲舍利。學人檀越共建塔焉。

後唐定州開元寺貞辯傳

釋貞辯。中山人也。少知出塵。長誓修學。剋苦之性。人不堪其憂。一志聽尋。暇則刺血書經。又鍼血畫立觀自在像。慈氏像等。嘗因行道困息。有二天女來相撓惱。辯誓之曰。我心匪石。吾以神呪被汝。彼眾不容去。自此道勝。魔亦無蹤。辯負笈抵太原城聽習。時中山王氏與後唐李氏封境相接。虞其覘聞者。并州城內不容外僧。辯由此驅出。遂於野外古冢閒宿。會武皇

帝畋遊。豕在圍場中。辯固不知方。將入城赴講。見旌旗騎卒。縮身還入穴中。武皇疑。令擒見問其故。遂驗豕中敷草座案硯。疏鈔羅布。遂命入府供養。時曹太后深加仰重。辯訴於太后曰。止以學法爲懷。久在王宮。不樂如桔槔耳。武皇縱其自由。乃成其業。洎王處直平。乃歸中山講訓。補故伽藍。無不諧願。有婦人陳氏布髮掩地。請辯蹈之。撰上生經鈔爲學者所貴。時號辯鈔者是。後終於此寺焉。

後唐會稽郡大善寺虛受傳

釋虛受。嘉禾禦兒人也。納戒後。於上都習學內外博

通傳講數本大經論不憚宣導。咸通中累應奉聖節。充左街鑒義。輩流孰不弭伏。及廣明中京闕盜據。逃難遷迤。抵越大善寺。同好者命講涅槃維摩二經。卽天祐年中也。因憤謙雅等師。釋崇福疏繁略不中。其猶以水濟水終無必濟焉。遂撰義評鈔十四卷。同光中方畢軸。又因講俱舍論疏。有賈曾侍郎序。次僧圓暉序。皆著鈔解之。其文富贍。昔嘗染指知焉。受於涅槃辯而非略。仍多駁議小遠之疏。免爲青蠅之玷。餘則法華百法唯識各有別行義章。受性且狷急。與人不同。畜弟子無一可中。嘗自執爨饌齋食。柴生火滅。

復吹又熸。怒發汲水沃之。終日不食而講焉。及晚年
眼昏甚。登師子座。戴竹笠而講。貴目不閃爍爾。或譏
其慢眾。受亦不介意。屬武肅王錢氏按部至越。遂出
謁見。王素嚮風。乃加優禮。言勞再三。暨乾化中。於會
稽開元寺度戒。命之充監壇選練。吳會閒行此職者。
自受始也。王表於朝廷。薦其紫衣。莊宗制賜。行人齋
至營止。時受講當上生經疏序。至若洪鐘而虛受。受
捨塵柄言曰。某得名無典實。今後更爲虛受。小子識
之。乃狀聞王。王曰。此僧必無恩命分。何名虛受乎。至
同光乙酉歲受終。迨海艦齋誥牒來。稽其終日正到

青社果符武肅之言。有文集數卷。述義章三十餘卷。行之於代。

後唐杭州龍興寺可周傳

釋可周。俗姓傅。晉陵人也。出家於本部建元寺。循良厥性。切問於勤。友生勉之曰。非其地。樹之不生。今豫章經謂之江。論謂之海。胡不往請業乎。周感其開導。挈囊達彼。遇雲表法師盛集。窮法華慈恩大疏。日就月將。幹運深趣。昭宗初。自江西迴台越之閒。命其啓發。梁乾化二年。受杭州龍興寺。召開演。黑白眾恆有半千。兩浙武肅王錢氏。命於天寶堂。夜爲冥司講經。

鬼神現形扈衛。往往人覩焉。嘗有祭銅官祠神。巫氏久請不下。後附巫曰。吾隨從大神。去西關天寶堂聽法方迴。武肅王聞而鄭重。賚周中金如意。并鉢紫衣一副。加號精志通明焉。以天成元年終於觀音院本房。初周乾寧四年。戾止台州松山寺講疏。闕鈔。遂依疏節成五卷。曰評經鈔。音訓五帖解。宣律師法華序鈔一卷。行於浙之左右。弟子相繼不絕。

後唐東京相國寺貞誨傳

釋貞誨。姓包氏。吳郡常熟人也。年始十三。出家於本州龍興寺。其性沈靜。分陰是競。方踰一稔。誦徹法華

經。如是恆業。日周二部。年十九。於揚州擇名師受具足法。自爾西之伊洛。北抵晉郊。凡有講筵。下風求益。覈其經論。窮其性相。輩流之間。罕齊馳騫。至於非朋弱友。弃背如也。唐天祐元年。至今東京相國寺寓舍。講導法華經十許徧。人未歸重。則知奇貨之售。亦有時焉。及梁氏都於京。人物委輸。貞明二年。會宋州帥孔公。仰誨風規。知其道行。便陳師友之禮。捨俸財。置長講法華經堂於西塔院。從此翕然盛集。誨旁讀大藏教文。二時行道。精進罔疲。凡世伎術百家之言。黜於議論之外。誠門徒曰。異端之說。汨亂真心。無記

不熏。何須習俗。吾止願爲師子吼。不作野犴鳴也。但專香燭塗掃。以內院爲息肩之地。至後唐清泰二年二月十日。召弟子五十餘人。自具香湯澡浴。令唱上生禮佛。罄捨衣資。爲非時僧得施半齋。僧訖。至十一日。望空合掌云。勞其眾聖。排空相迎。滿百徒侶。爾日皆聞天樂之音。頃刻而卒。俗壽七十三。僧夏五十四臘。於寺講貫三十餘年。經講計三十七座。覽藏經二徧。修彌勒內院業。以其年二月十八日。葬浚郊東寺莊之原。旛幢威儀。緇白弟子。約千餘人。會送焉。

後唐洛京長壽寺可止傳

釋可止。姓馬氏。范陽大房山高正人也。年甫十二。迥有出俗之心。依憫忠寺法貞律師。年十五爲息慈。辭師往真定。習學經論。時大華嚴寺有仁楚法師講。因明論。止執卷服膺三徧。精義入神。眾推俊邁。有老宿維摩和尚者。釋門之奇士也。問楚師曰。門人秀拔熟者爲先。曰。有幽州沙彌者。溫故知新。厲精弗懈。於是求見。遂質問勝軍比量。隨難應變。辭不可屈。維摩曰。後生可畏。契經所謂雖小不可欺也。遂率力請止開講。恆陽緇素無不欽羨焉。迨十九歲。抵五臺山求戒。於受前。方便感文殊靈光燭身。已而歸寧父母及師。

於寺敷演二十三。往并部。習法華經百法論。景福年中。至河池。有請講。因明。後於長安大莊嚴寺。化徒數載。乾寧三年。進詩。昭宗賜紫袈裟。應制內殿。本道劉仁恭者。據有北門。控扼蕃漢。聞止之名。移書召歸故鄉。其父與師相次物故。母猶在堂。止持盂乞食。以供甘旨。行誦青龍疏三載。文徹忽有巨蟒見於房。矯首顧視。似有所告。時同院僧居曉。博物釋子也。且曰。蛇則目睛不瞬。今其動乎。得非龍也。止焚香祝之曰。貧道念青龍疏。營齋養母。苟實龍神軫念。希值一檀越。居數日。燕師家子曰。制勝司徒。召申供養。時莊宗遣

兵出飛狐以圍之。歷乎年載。百穀勇貴。止頓釋憂懼。未幾燕陷。劉氏父子俘歸晉陽。止避亂中山。節度使王處直素欽名譽。請於開元寺安置。逐月供俸。止著頓漸教義鈔一卷。見行於代。天成三年戊子。王師問罪定州陷焉。招討使王晏休得瀛王馮道書令尋止。旣見以車馬送至洛京。河南尹秦王從榮優禮待之。奏署大師。號文智焉。於長壽淨土院住持。應順元年甲午正月二十二日忽微疾作。召弟子助吾往生。念彌陀佛奄然而化。俗年七十五。僧臘五十六。閏正月二日。茶毗收遺骨。至清泰二年四月八日。建塔於龍

門山廣化寺之東南隅。止風神峭拔。戒節孤高。百家子史經目無遺。該博之外。尤所長者。近體聲律詩也。有贈樊川長老詩流傳人口。在定州日。中山與太原互相疑貳。諸侯兼并。王令方欲繼好息民。因命僧齋於慶雲寺。會有獻白鵲者。王曰。燕人詩客試爲詠題。止卽席而成。後句云。不知誰會喃喃語。必向王前報太平。王欣然。詩人李洞者。風骨僻異。慕賈閬仙之模貳。景福中在河池相遇。贈止三篇。時宰相孫公渥趙公鳳馬公裔孫。竇學士夢徵符侍郎蒙李侍郎詳皆唱予和汝。塤箎韻諧。止頃在長安講罷。遊終南山道。

遙園。是姚秦什法師譯經之地。年代寢深。鞠爲茂草。且曰。吾爲釋子。忍不興乎。奏昭宗。乞重修。帝允。仍舊。賜草堂寺額。後請樊川淨休禪伯。聚徒談玄矣。及在洛也。講外長誦金剛經。不知紀極。昔多居終南山。崆峒山。故有三山集詩三百五十篇。盛行於時。弟子修文。修智。修行。微見師之道焉。

漢太原崇福寺巨岷傳

釋巨岷。姓任氏。西河人也。父遊於藝。而賁止園。母王氏。戒受八關心歸三寶。從妊岷也。更好善緣。復求福利。而生令子。及生年甫七歲。志氣馘篤。暫見佛像。注

仰欣然。父母知有宿因。或攜入寺。意欲忘歸。至本郡
淨心院。見宣遠論師。志戀其房。泣求攝受。二親知不
能阻其願。咸皆可之。年十歲。誦終法華維摩二經。日
持十卷。更無閒隔。如執璫璃之器。其舒徐恣制。若老
成焉。迨圓滿足。便習尸羅。克通開制之科。恆照欣戚
之鑑。自爾大乘理趣。經論精窮。得其師門。則并部永
和三學也。俾夜作晝。窗案是臨。不暇諸他。除研習義
章。修六事二因也。於大般涅槃經。兼因明論。末年逾
切。又傳輸金論。盡屏餘緣。各講十徧。仍求輔亮。博覽
羣書。得義最精。又揚具美。尋稟綸言。住城內天王院。

與弟子俱供億不虧。傳持無替。乾祐元年。漢祖以龍
潛晉土之日。便仰岷名。特降庭臣。賜紫衣。號圓智大
師。續有詔。宣住崇福寺講堂院。仍充管内僧正。經年
而變法於晉。檢策僧徒。如風偃草。至乾祐二年十一
月五日。無疾而終。於時四眾含悲。一城戀德。俗齡九
十三。法臘五十四。乃遵西域茶毗禮。多投香水。或執
旛花。黑白之眾盈郊。黯靄之雲蔽日。未容火滅。皆捧
寶瓶。待盛梁粟之形。同見熏修之體。時得舍利者。隨
自因緣。或多或少。別得遺骨。具表奏聞。漢主敕葬於
西山天龍寺。凡事官供。起石塔。敕謚號曰達識焉。

漢棣州開元寺恆超傳

釋恆超。姓馮氏。范陽人也。祖父不仕。世修儒道。而家富巨萬。超生而聰慧。居童稚羣。不貪戲弄。年十五。早通六籍。尤善風騷。辭調新奇。播流人口。忽一日。因閱佛經。洗然開悟。乃歎曰。人生富貴。喻等幻泡。唯有真乘。可登運載。遂投駐蹕寺。出俗。未周三祀。方議進修。晝夜不疲。而屬師亡。亦遵釋氏喪儀。守禮無怠。孝悌之名。燕人所美。梁乾化三年。往五臺山。受木叉戒。由是陟遐自邇。切問近思。俄徵伐木之章。且狎成人之友。結契遠求名匠。阻兩河閒。兵未罷。路不通。南則梁

龍塞外矣。郡將聞而止。又相國瀛王馮道聞其名。知是鄉關宗人。先遺其書。序以歸向之意。超曰。貧道閑人。早捨父母。剋志修行。本期彌勒知名。不謂浪傳於宰衡之耳也。於吾何益。門人敢喻不得已。而荅書具陳出家之人。豈得以虛名薄利而畱心乎。瀛王益加鄭重。表聞漢祖。遂就賜紫衣。自此忽忽不樂。以乾祐二年仲春三日。微疾數辰。而終於本院。院眾咸聞。天樂沸空。乃升兜率之明證也。春秋七十三。僧臘三十五。門人洞微與學徒百餘人。持心喪。傾城士庶僧尼。會送城外。具茶毗禮。收舍利二百餘顆。分施之外。緘

五十顆於本院起塔以葬之。瀛王未知。別奏賜師號曰德正。乃刊敕文於石塔焉。

漢洛京法林院僧照傳

釋僧照。姓張氏。范陽人也。年十四出家。投憫忠寺。聰晤絕儔。神儀偉秀。初受經。偈日誦數千百言。目所覽者。過於宿習。吐論知見。有老成之風。遂度爲沙彌。受具已來。歷於再閏。暗誦經典。已踰六大部矣。卽最勝王大悲維摩法華等經。傍加聽尋經論。十數年間。深文伏羲藍出青矣。天祐中。遊方南下。爰屆中山。元戎王處直。請住法華寺。相次易帥。請之。太傅隴西公連

表薦賜紫方袍。加至真大師。次則扶風馬公請爲僧正。非所好也。及抵洛陽。有命開法華經講止法林院。況乎都闕。浩穰象龍。輻湊。及照之唱導。翕如於下風。伏膺矣。以乾祐元年三月二十六日。示滅於講院。春秋七十。僧臘五十四。眾號慕。侍中李公傾易定。曾爲外護。復守洛宅。飾終喪禮。悉以資奉。粵四月三日。遷神於城南。行茶毗法。收舍利紅潤可數百粒。濟陽丁公爲保釐之遙職。爲樹塔於廣化寺之南岡。照平昔講凡七十餘座。勤勤爲法門生頗多。宰臣馬公孫最所欽重。前後贈詩僅數十首。洛中爲美談矣。

漢洛陽天宮寺從隱傳

江夢

釋從隱。姓劉氏。洛陽三鄉人也。少年敏慧。誓欲出塵。二親既聽。乃投本邑竹閣院。依師誦習。陶練靈府。尋於嵩陽受戒畢。就長水聽采。纔厯數年。克通百法中。觀彌陀三經論焉。而誣師年老。深許隱之。博達性相。後於洛布金院。赴請敷演。至後唐清泰中。誣付講座。日爲眾三登法席。夏中長晷。覽藏經一秩。精進苦節。人無與比。乾祐二年正月。示疾而終。俗壽五十三。僧臘三十二。乃依天竺法火化。收合真體。圓淨堪愛。門人樹塔至今存焉。次有長水縣。縣泉院釋夢江者。姓

楊氏。本邑人也。神彩灑落。超拔凡態。遂願出家。恆誦仁王般若。進具後。講百法論。清泰中。龍門廣化寺。請爲眾開演。遇帝幸其寺。宣問妙辯。天逸悅。可上心。時於御前。賜紫袈裟。確乎不受。訓導二十餘年。講罷行道禮佛。日唯一食。慈忍於物。罕逢慍色。周顯德三年疾終。緇素悲慕。爲其建塔矣。

漢杭州龍興寺宗季傳

釋宗季者。俗姓俞。臨安人也。稚齒瑰偉。心志剛直。嘗天震鄰家樹。季隨僵仆。有姊尼抱就膝。視之曰。此非震死。且有生候。至夜未央。甦而復作。遂勸令出家。事

欣平寺僧。後往衢州投巨信論師。學名數論。文義淹
詳。且難詘伏。鋒芒如也。迨迴杭。龍興寺召講。時僧正
蘊讓給慧縱橫。兩面之敵也。與閭正方遠先生。江東
羅隱爲莫逆之交也。見而申問。季作二百語訓之。讓
正賞歎。遂請開講。四十餘年。出弟子七八百人。漢乾
祐戊申歲。疾終於本房。初季講次。遇一異人作胡語。
問西域未來之經論。一眾驚然。季眇二目。曾夜行。感
神光引之。常覽古師之述。作曰。可俯而窺也。遂撰永
新鈔。釋般若心經。暉理鈔。解上生經。彌勒成佛經疏。
鈔。補猷鈔。闕。諸別行義章。可數十卷。並行於世。季道

高僧傳三集卷一
行孤僻。性情方正。寡言語。氣貌高邁。誓不趨俗舍。暨
老。懇請亦罕。赴白衣家。居唯屢空。衍然自任。而孜孜
手不釋卷。樂道向終。至今此宗越多弟子。講導不泯
焉。

周魏府觀音院智佺傳

釋智佺。姓張氏。銅臺永濟人也。九歲於鄴都臨清王
舍城寺事師。暨受具戒。身器挺然八尺。面色玉如。行
步若舒鴈。言音如扣鐘。人望之凜然。僉曰。美丈夫也。
恆誦諸經。晝三夜三。禮佛無闕。本師知其法器。遣往
滑臺。抵明福寺。就暉師講肆。朞月。頓見諸法體用。喜

不自任。時暉之門生。無勇傑幹者數十員。皆出佺之下。徇睢陽人請講未久。又今東京遇信士。捨宅爲萬歲百法院。由此洛京陳許徐宿維青琴臺。咸樂請其敷演。自鳩聚檀嚫。前後飯僧三十萬。天雄軍戴張郛三家同建觀音院。命居之。佺敏利之性。天資初終。講百法論。可百許徧。登法座。多不臨文。懸述辯給。後三過覽大藏經。以輔見知。其誦諷經呪也。嘗聞戶外間。然有彈指聲者。感鬼神讚歎。魏帥陳君思讓。篤志歸依。表薦紫衣師號曰歸政。殆臨八十一而刻意學。歐王書體。僅入能妙。或問之曰。吾習來生字耳。顯德

五年年八十三。呼弟子奉晏等囑累。令造木輦一所。斂送闍維。至其年十一月十一日奄終。奉木塔。舉高三丈餘。縱燎時。有白鶴哀鳴。紫雲旋覆。收拾舍利。建塔緘焉。

宋秀州靈光寺皓端傳。不嗣文惠。其族葉餘。終三釋皓端。姓張氏。嘉禾人也。九歲捨家入靈光精舍。師授經法。如溫舊業焉。年登弱冠。受形俱無表。於四明阿育王寺遇希覺律師。盛揚南山律。端則一聽。旋有通明。義門無壅。尋投金華雲法師學。名數一支。并法華經。後受吳興緇伍所請。講論焉。兩浙武肅王錢氏。

召於王府羅漢寺演訓。復令於真身塔寺宣導。於時有台教師玄燭者。彼宗號爲第十祖。端依附之。果了一心三觀。遂撰金光明經隨文釋十卷。由是兩宗法要一徑路通。忠獻王錢氏借賜紫衣。別署大德。號崇法焉。後誓約不出寺門。慕遠公之不渡虎溪也。高尙其事。僅二十餘年。身無長衣。口無豐味。居不施關。坐唯一榻。以建隆二年三月十八日坐滅於本房。容貌猶生。三日焚之於城西。得舍利於煨燼之末。俗年七十二。僧臘五十二。凡著述傳錄記讚七十許卷。學得其門者止八十餘人。端性耿介。言無苟且。一坐之間。

五年年八十三。呼弟子奉晏等囑累。令造木輦一所。斂送闍維。至其年十一月十一日奄終。奉木塔。舉高三丈餘。縱燎時。有白鶴哀鳴。紫雲旋覆。收拾舍利。建塔緘焉。

宋秀州靈光寺皓端傳

釋皓端。姓張氏。嘉禾人也。九歲捨家入靈光精舍。師授經法。如溫舊業焉。年登弱冠。受形俱無表。於四明阿育王寺遇希覺律師。盛揚南山律。端則一聽。旋有通明。義門無壅。尋投金華雲法師。學名數一支。并法華經。後受吳興緇伍所請。講論焉。兩浙武肅王錢氏。

召於王府羅漢寺演訓。復令於真身塔寺宣導。於時有台教師玄燭者。彼宗號爲第十祖。端依附之。果了一心三觀。遂撰金光明經隨文釋十卷。由是兩宗法要一徑路通。忠獻王錢氏借賜紫衣。別署大德。號崇法焉。後誓約不出寺門。慕遠公之不渡虎溪也。高尙其事。僅二十餘年。身無長衣。口無豐味。居不施關。坐唯一榻。以建隆二年三月十八日坐滅於本房。容貌猶生。三日焚之於城西。得舍利於煨燼之末。俗年七十二。僧臘五十二。凡著述傳錄記讚七十許卷。學得其門者止八十餘人。端性耿介。言無苟且。一坐之間。

不談世論。唯以佛法爲已務。可謂傳翼之象王矣。祕書監錢昱嘗典秀郡。躬覩端之標格。爲著行錄焉。

宋東京天清寺傳章傳

釋傳章。俗姓彭氏。開封東明人也。厥父諱卽邑甸之上農也。塵務之外。正見不回。恆讀佛經。懸解詮旨。母邢氏嘗夢入法宇。手探道器。因而娠焉。與父知懷非常之子。指腹誓令出俗。年甫十一。乃禮本邑唯識師祕公爲師。一見異之。初授淨名仁王法華三經。及削髮去周羅。隨祕公遊五臺。禮文殊應跡之地。其年受具爲息慈日。便於浚郊清朗法師座下聽習法華經。

後於睢陽道雅法師重溫前業。尋學唯識於本師。頗揭厲於義津法水。又親附副僧錄通慧。因明且臻其極章。日誦三經兼二戒本。講貫訓徒。向二十載。未嘗少輟。廣順中。左街僧錄廣智大師薦聞於周高祖。賜紫方袍。大宋乾德二年。左街僧錄道深薦於太祖神德皇帝。賜師號曰義明。俄示疾而終於本院。春秋五十五。法歲三十六。未絕之前。命筆作偈警世。而贈諸朋執矣。所度弟子一十五人。以其年十一月十六日。卜京之南原。用茶毗之法。薪盡火滅。得舌且不灰。眾歎戒德。門人檀信共立塔焉。則開寶五年也。先是厥

父恆務法華經。終後焚之。亦舌不壞。子父同驗。實爲罕有。相國寺清慧大師。鑒炳爲塔銘焉。

宋并州崇福寺佛山院繼倫傳

釋繼倫。姓曹氏。晉陽人也。弱齒而壯其志。勇其心。決求出家。本師授法華經。日念三紙。時驚宿習。慧察過人。登戒之後。至年二十一。學通法華經義理幽蹟。唯識因明二論一覽能講。由是著述其鈔。至今河東盛行三講。恆一百五十餘徒。從其道訓。又撰法華鈔三卷。其爲人也。慈忍成性。戒範堅強。人望之而心服。以劉氏據有并汾。酷重其道。署號法寶。錄右街僧事。寬

猛相參無敢違拒。以僞漢己巳歲冬十月示疾。心祈口述。願生知足天。終後頂熱半日方冷。則開寶二年也。享年五十一。闍維畢。淘獲舍利。遠近取供養焉。

宋齊州開元寺義楚傳

修進省倫

釋義楚。俗姓裴氏。祖相州安陽人也。楚七歲來省。厯下臨壇大德修進。因爲出家師也。進乃楚之諸父也。季父省倫居香嚴院。進也誦觀音普門支經。向十萬徧立禮法華經字字各拜。拜且徹部焉。倫則青正主宰禪居。誦大悲佛頂俱一億徧。楚執柯伐木。熏習相資。登此近圓。勤學不懈。敏慧夙成。俱舍一宗。造微臻

極。遂傳講圓暉疏十許徧。後該覽大藏三徧。乃慨儒家爲佛教之文。而多謬解。解旣謬歟。事多悞用。擬白樂天六帖。纂釋氏義理文章。庶事羣品。以類相從。建其門目。總括大綱。計五十部。隨事別列四百四十門。始從法王利見部。終師子獸類部。其閒物類檢括周旋。令供筆之時。必無告乏矣。一十年中孜孜罔倦。起晉開運二年。至顯德元年。畢進呈。世宗敕付史館。賜紫衣。仍加號明教大師。以開寶中。終於龍興伽藍。俗壽七十四。法臘五十四。楚始謀此作。隨得便書。哀多益寡。日居月諸。鬱成編錄。忽因本院門古石上有六

帖二字。天然分明。覩此靈符。乃知宿定。搜不幹古筆。不停綴。時樞密相國王公朴爲楚作序。冠於編首。今行於寰海矣。初楚著述。心亦勞止。而雙目喪明。醫工莫療。遂冥心懺過。慮刪碎教文。裁量差脫。如是虔虔更無閒息。再歲還明。人謂其徵感焉。

宋杭州慈光院晤恩傳

釋晤恩。字修已。姑蘇常熟人也。姓路。母張氏。嘗夢梵僧入其家而妊焉。及稚孺。見沙門相。必起迎遲。年十三。聞誦彌陀經。遂求出家。親黨饒愛。再三沮之。乃投破山興福寺受訓。後唐長興中。受滿分戒。登往崑山。

慧聚寺學南山律。晉天福初。從構李皓端師。聽習經論。懸解之性天然。時輩輒難抗敵。後微聞天台三觀六卽之說。冥符意解。漢開運中。造錢唐慈光院。志因師講貫。彌年通達法華光明經。止觀論。咸洞玄微。尋施覆述出。弟子相次角立。雍熙三年八月朔日。恩於中夜。覩白光自井而出。明滅不恆。謂門人曰。吾報齡極於此矣。乃絕粒。禁言。一心念佛。次夢擁納沙門執金鑪焚香三遶其室。自言祖師灌頂來此相迎。汝當去矣。夢覺呼弟子至。猶聞異香。至二十五日。爲弟子說止觀旨歸。及觀心義。辰時端坐面西而化。享年七

十五。僧臘五十五。其夜院僧有興文偃等。皆聞空中絲竹嘹亮。而無鞀鼓。且多鈴鐸。漸久漸遠。依稀西去。迨九月九日。依西域法。焚獲舍利青白圓粒無算。恩平時謹重一食。不離衣鉢。不畜財寶。臥必右脅。坐必加趺。弟子輩設堂居亦同。今之禪室。立制嚴峻。日別親視。明相方許淨人施粥。曾有晚飲薯蕷湯者。卽時擯出齋堂。每一布薩。則潛洒不止。蓋思其大集滿洲之言耳。偏誨人以彌陀淨業。救生死事。受教得生。感祥可見者。往往有之。凡與人言。不問賢不肖。悉示以一乘圓意。或怪不逗機者。乃曰。與作毒鼓之緣耳。不

喜襍交游。不好言世俗事。雖大人豪族。未嘗輒問名居。況迺趨其門乎。先是天台宗教。會昌毀廢。文義殘缺。談妙之辭。沒名不顯。恩尋繹十妙之始終。研覈五重之旨趣。講大玄義文句。止觀二十餘周。解行兼明。目足雙運。使法華大旨。全美流於代者。恩之力也。又慊昔人科節。與荆溪記不相符順。因著玄義文句止觀。金光明金鐔論科總三十五帖。見行於世。吁。河漢中有魚。泝流而上者。何潛泳有所取。故恩公不寬乘戒而出。弟子十有七人。求解而行。行耳。

宋天台山螺溪傳教院義寂傳

釋義寂。字常照。姓胡氏。溫州永嘉人也。母妊娠。公日不喜葷血。生乃首蒙紫帽而誕焉。幼啓二親。堅求去俗。旋入開元伽藍。師授法華經。朞月而徹。寺之耆老。稱歎希有。受具已。往會稽學南山鈔。旣通律義。乃造天台山。研尋止觀。其所易解。猶河南一徧照也。先是智者教迹。遠則安史兵殘。近則會昌焚毀。零編斷簡。本折枝摧。傳者何憑。端正其學。寂思鳩集也。適金華古藏中得淨名疏而已。後歛告韶禪師。囑人泛舟於日本國。購獲僅足。由是博聞多識。微寂此宗學者。幾握半珠爲家寶歟。遂於佛隴道場國清寺。相繼講訓。

今許王錢氏在兩浙日。累請開演。私署淨光大師並
紫方袍。辭讓不卻。受而不稱。及興螺溪道場。四方學
侶霧擁雲屯。太平興國五年。朝廷條貫緇伍經業。寂
從山入州治寺。寺東樓安置。樓近大山。夜夢剎柱陷
沒於地。意頗惡之。自徙於西偏僧房。其夜春雨甚。山
崩樓圯。人咸謂寂先見同修報得之眼焉。因受黃巖
邑人請。乘舟泛江放生。講流水長者品。至海門靈石。
是智者冬居道場也。勸人修寺塑像。入緣者繁沓。今
上遣高品衛紹欽入山。重建壽昌寺也。諸官同命受
菩薩戒。雍熙初。永安縣請於光明寺受戒。古殿像墮。

腹中獲發願辭。卽唐咸通六年。沙門希皎施戒。勸七鄉人裝塑尊像。願捨報爲男子。童真出家。常布褐傳法。利樂眾生云。觀者皆意寂之前身也。四年臨海。緡雲永康東陽諸邑。請其施戒。九月寂至。白太末。十月寢疾。本院方丈。十一月四日。囑誠門人不許哭泣。祭奠。應緣俗禮者。非吾弟子也。卽窆於方丈樹小塔焉。高年六十九。法臘五十矣。四方傳法弟子。見星而舍者數百人。寂平素講法華經并玄義。共二十許座。光明淨名梵網等經。止觀金錍等論。法界還源等觀。禪源詮。永嘉集各數徧。所著止觀義例。法華十妙不二。

門科節數卷。自智者捐世。六代傳法湛然師之後。二百餘齡。寂受遺寄。最克負荷。其如炎蒸講貫。而無汗之霑洽。曾不久聽。而勝解佛乘。每一談揚。則擬金玉。應召羽商和。彼九旬說妙相。去幾何。又嘗寓四明育王寺。夢登國清寺上方。有寶莊嚴幢座。題曰文殊臺。設栴檀闌隔。求入無由。俄覩觀音菩薩從堂徐出。以手攘卻行馬。低迺相接。斯須覺已與觀音身混合不分。因而驚寤。自是之來。樂說無盡矣。或曰。入普門智。乘利物悲。上合佛覺。證無上故。下合眾生。凡同體故。開則羣靈混成一法。得是心者。非觀音而誰歟。是以

講談也。施戒也。自甌越之鄉。迨三天子障。民多涕戾。俗尙畋獵。受寂之訓也。咸食樗革音。說法之功。所謂善建。由是堂室閒可見者。曰澄或。曰寶翔。曰義通。及平台之民庶。曾受戒法。迎真相來州治。開元寺祭饗。皆縞素哀泣。天爲之變慘。其慈攝之所感。知州鄭公元龜。爲詩悲悼焉。

論曰。玄默垂文。聖人俯察。河雒之流有告。圖書之法作程。禹受斯符。乃爲經緯。本六十餘字。訓第表明。號洪範以開章。得彝倫而道敘。帝王之法粲然可觀。祖述之家翕爾宗此。我之佛道可弗然耶。教自西傳。若

龜馬之文乍辯。聲由此盛。如夏商之美。惟揚。及其講
訓相資。籤箋互出。因分異轍。各競顓門。施巧智之莫
京。致慧心之懸合。宜乎得正信者。必開正眼。見正道
者。必事正修。倒本前因。則以決擇爲主。原夫能詮之
教。喻圖書也。所詮之理。喻訓第也。經容緯入。緯變經
存。令表顯之名言。從體義之相襍。唯識僉推於護法。
成卽司南。婆沙奄有於餘師。說同衍字。良以各迷已
見。皆未極成。正不正之說。恢張。玄又玄之談。崛起。大
抵無名相法。作名相說。非如色法。影質易尋。名色交
加。喜生迷競。又以言存一意。義止一途。隨情取舍之。

時未爲允當。隨轉理門之處。蓋涉無文。加復教有弛張。意闕詳略。討尋者。非英明而莫悟。承領者。非行位而邛知。在人亡書。以教爲折中。故論中以四種徵理。理則難隱。一觀待。二作用。三法爾。四證成。用斯道理。義豈惑乎。譬如甲氏背人而去。有二三子相問曰。彼去者誰耶。一云乙也。一云丙也。此俱未是。彼有識人云。甲也。迴面視之。是甲非乙。由其不識。遂有多名。識者一呼應聲而至。親得自體。不涉異緣。故曰。精義無二也。因義生解。解必虛通。除其執情。令生正解。斷其迷執。執情斷故。所執便遣。既能生解。則斷障。二重斷。

染依他清淨依他圓成。故得二勝果焉。不然者。認相似法。墮惡取空。曳曲木於稠林。泛膠舟於苦海。又不可勝道也。瑜伽論中。契經體有二。一文。二義。文是所依。義是能依。如是二種。總名一切所知境界也。夫以能化之教。已翻所詮之理。難悟。苟非宿慧。安喻經心。宿慧當多世之熏。方能生起。經心乃大雄之意。豈易尋求。諺所謂老見事長。佛已三祇之揚歷。多言或中。法從諸聖之同宣。豈得以夏蟲共論。其凌澌并魚互談。其渤澥。此誠不可也。必須近佛菩薩。善慧法師。四無礙居遊戲之中。八辯音演自他之利。祇如天親大

士將世尊之一言。中道圓宗。成諸法之五位。如龍帶
涓滴而起。爲雨望苗稼而施。又同命包作緯於春秋。
鑿度爲資於大易。此皆善其通變。能其揣摩。以利根
而教鈍根。以正見而誘邪見。都稱爲摩訶般特伽也。
西域蒲塞。冶家子以爲裘。此方俊才。鬻乳人而加水。
成裘則易。以日見而畱心。免水則難。以傳來而隔手。
昔以講人論法。造疏尋宗。用成實法數之名。補大乘
闕員之義。其有解法名目。隨人見知。未融六釋之端。
何暇三隅之反。至若黎邪是報。非報。化人有心無心。
和合怖數之徒。聞熏滅不滅等。百有餘科。並三藏四

含之盤根。大小兩宗之鈴鍵。先賢之所不決。令哲之所共疑。但謂闕如。所知成障。及乎獎師西復。梵本東傳。富瑜伽之寶林。開唯識之淵府。摩訶衍足殺三摩。明名數均著作之家。立破定是非之量。深山大澤。必生龍蛇。有大乘基爲其高足。不緣宿習多見生知。謂之義天。則明星有爛。謂之理窟。則善閉無關。堂堂合周髀之儀。軋軋應崑崙之軸。有經皆講。無疏不成。權奇百本之名。控壓四人之聖。復次光也。寶也。測乎沼乎。章句之學頗長。釋籤之理何富。世茂珠林。邁編圖紀。璟附量度於鯨海。尙綴文榮於玉華。究三論極乎

瑗康窮方等歸乎楷景觀公撰集華嚴命章解相入
之連環且無難色通絕行之斷閣故立易功法藏從
性海而遊智昇自名流而出偉歟一行所作通神實
僧相之法王乃人形之菩薩忠氤琳甫賁秀詵真俱
參譯判經盡開荒闢土於爍宗密美乎湛然悟達全
才徹公令範可以副人之求備哉餘諸上士擅美殊
方落落英翹互有長短矧以佛之說經申經者論經
由論顯論待疏通疏總義章義從師述況以隔羅縠
者見猶未盡大徧知者知方得全射侯之矢易疎訟
脈之求難中若非親證親說得自體之分明載驅載

馳妄他求之。晦曖如攝異門分。差別之相難知。故智論中。吾滅度後。所有撰集者。皆爲論藏攝也。俱作導師。指迷人之歸路。悉銜明燭。照暗室之績工。動戒足以行之。入定門而安矣。蓋纏克斷。智慧成功。咸從生死之河。盡度涅槃之岸。此始可與言從聞且思。思至而修。證大圓寂者。過此以往。未知執名滯義。問欲何爲。故曰。精義入神。以致用也。既有所用。則捨筌蹄而直造佛地。此則深於其道者也。

高僧傳三集卷第七

終

音釋

赧乃版切面從初江切倣昌六切甬尹竦切甬鰻

鯨鯨母官切鯨落時忍切似蛆七余切竅苦弔切

裛裛乙及切香襲衣也入錚錚初耕切鏹七恭切茜

倉甸切茅茜慄慄齒兩切慄慄呼爾奴結切樞祐渠

切閩彌鄰切東譚切於真閔無分類盧對切鍼職深

針癡廉切梏梏古沃切邐邐力紙切邐邐行貌

同覘也梏梏胡戒切邐邐里切邐邐行貌

駁北角切狷古泣切爨七亂切燔音尖火售承呪

也俘芳符切軍損篴篴並樂器土曰篴直離切篴篴音

慘色也霽徒對切輻力刃切蠡音禮粵王伐切遙

初救晷居洧切秩直一切僵僵居良切僵僵什頓切甦

素姑切死也詘丑律切衍苦旦切睢音雖睢音雖閼苦賜切靜

而更生也也詘下也也衍樂也也睢陽縣名閼切靜

寂也橋將遂切橋嘹憐蕭切嘹徒刀切鼓薯音薯

署預音預潛涕所閼切泝桑故切逆圯皮美切桓桂胡

故切桂蒲禮切桓食枕或於六迫以周切弛詩

切廢斯息茲切凌斯冰渤蒲沒切渤解蟹鬻於六切

也髀旁禮車烏黠切診候庵暖烏代切日無

光也

